




家
英
貴
子
百


寶
堂
海
林



霜哺遺音

臥雪州堂藏板

題霜哺遺音



瑰竒詭卓之事震駭於聽聞者文
士所藉以張其詞章之偉也人倫
之常檢中和之純德其發於文也
難為工矣禮教既修風俗隆美閭
巷女子如古柏舟之節夫死秉禮
守正撫育遺孤而教之海內賢女

所為率相類也故述為文而求奇者尤難雖然君子為文貴益去教子長愛奇子長之病也常德固有尊於奇行述常德之為文豈必有遜於奇文哉吳縣奉直大夫袁君森如有側室曰韓孺人年二十五而寡守節教子至於成立吏請於

朝而旌之其子徧求賢士大夫為詩文以表其行合成巨編曰霜哺遺音其族錢塘簡齋先生持示余又為之求言焉余閱之凡傳誌記贊詩歌之體備矣其間若簡齋先生及嘉定錢辛楣學士又兼為兩體甚矣諸公之樂道人善也余不

識其家人無由別詢其嘉言懿行之細曲若章章大節則諸公之言美矣余無以復益聊書此以復於簡齋先生謂諸公為文之誼雖謂賢於子長可也

桐城姚鼐

霜 唳 韻 音 敘

肯 剛 袁 董 樊 少 孤 樊 舟 鞠 高 出 成

太 廣 向 士 大 夫 詩 文 頌 揚 樊 了 行

積 數 十 軸 陳 眉 公 爲 出 題 曰 霜 唳

篇 霜 皆 唳 也 唳 皆 以 况 于 鳥 出 唳

離 也 今 袁 君 又 愷 出 每 韓 太 孺 几

奉 直 大 夫 柳 邨 公 出 諧 也 季 二 十

支

一

五而寡字了棟孤葡萄嘗觀苦霜月
十五季而履巡棟閱公嘉其志了
為請了

菊而

煌其

門深谿顧姓沙觀察題其所以曰
竹柏樓竹柏也香母四時而不改
柯易葉香也一時名賢鉅卿又各

為詩歌記傳頌贊碑碣已鑿揚其

芬徽又愷奠而粹出爽然成快于

是轉即雪先生題其巖曰霜哺鑽

音乃其遠矣出故事也茲香又愷

乙是編屬敘于余詞乙卑賤不致

不與于諧先達又愷固請勉為錄

其榷然而乙答夫孺人出嘉言

行譜先鋒遺出詳錄煩余贊矣
乾隆五十九年太歲在壬子
楸歲聖在析木出濟初數則享
月八日中數則猶是陽月小雪
之也壬辰江聲撰



霜哺遺音卷一

頌 傳 墓志 序 記 贊 銘 誄 跋 賦

袁節婦韓氏

旌門頌 并序

蔣元益 長洲

節婦韓氏吳縣奉直大夫袁公諱永涵之側室年二十
五而寡卒於乾隆四十六年閏五月六日守節撫孤樓
居十有五年一時士大夫多爲傳志詩歌以紀其行是
年冬巡撫閩公具疏以

聞越明年

朝命如例旌其門實乾隆四十七年十二月也余忝舊
史氏聞節婦懿行及邀

國家非常之典不可以不文辭敢造

旌門頌八章章八句授其子廷檣俾鑣諸樂石傳示無極其辭曰

自古女宗於昭大節絜玉寒冰嚴霜朔雪躬著風徽人欽貞烈圖頌留傳後先一轍 吾吳氏族舊德推袁南陽賢媛造於清門肅雝內外佐理蘋蘩溫恭淑慎人無間言 乃夢熊羆祥徵舉子時鳳之毛時麟之趾則友其兄式穀已似鞠育恩勤惟力是耘 遭家不造遽斂所天身將殉矣念茲藐焉含辛勉撫視息少延樓屈竹柏十有五年 有子克家亦既授室顧樂鄰前銜悲曩

曰謂未亾人於事已畢地下相從神明可質 時當設悅鼓歛延賓母心悄悄訓止諄諄深明大義不昧前因洎歸淨域甫踰數旬 我聞在昔有周陶母絡秀之賢湛氏之偶伯仁重名士行不朽以古證今是宜有後國家旌典母也克當令儀令德可表可坊恩綸下賁懿行孔彰千秋百世繼序毋忘

袁母韓孺人傳

王鳴盛 嘉定

孺人姓韓氏吳中人也幼習姆教勤女紅奉直大夫候選知州柳村袁公配汪宜人舉丈夫子一人曰廷樞漁洲氏敦學行能克家矣而終鮮兄弟公聞孺人之賢遂納爲適焉時年十九矣佐理家政事事勤忠凡饋醢滫瀡挫鍼治繻鉤稽出納之務靡不親也靡不慎也舉丈夫子一人曰廷樞又愷氏孺人恩勤鞠育顧復出入跬步不離雖有婢獲不輕假手也歲在丁亥柳村公與汪宜人相繼捐館舍孺人痛不欲生誓願以身殉顧鄰下藐諸孤甫六齡爰隱忍視息制淚強進淖糜稱未亾人

嗣是撫育遺孤飲冰茹蘖者凡一十有五年坐臥一小樓非歲時伏臘足不輕下一切家事皆曰有家督在吾惟知撫孤耳他奚問邪暨廷禱出就外傅孺人訓課甚嚴庚子冬爲之授室今年春孺人四十初度廷禎廷禱爲孺人置酒稱壽孺人轉愀然曰吾今有子已成家室吾之事殆麤畢矣惟速從先大夫於九原乃吾素志耳何稱慶爲越兩月而孺人疾作遂以不起初度辭祝之言一若爲之識者吁此可以見孺人之素志先定之死靡佗者矣生於乾隆七年三月十一日卒於乾隆四十六年閏五月六日存年四十廷禱娶毛氏女一許字何

義杞

論曰聞之晉周伯仁之母李氏陶士行之母湛氏皆以賢德有令子而傳於後此其人視孟桓鍾郝之儔亦復奚異哉乃今於韓孺人觀之矣若夫彈別鵠離鸞之曲垂畫荻丸熊之教志堅於金石義烈於冰霜求諸古人亦罕儷焉嗚呼可謂難矣夫其辭祝而勵捐軀之志者識之卓也其未久而果踐厥志者天與人交相應也孺人亦弱女子耳殆幾幾乎由立節而進於立命者與予夙從太史氏後有記事載言之職而廷禎昆季與予善予之知孺人也詳爰爲詮次以備異日彤管之採擇云

袁節母韓孺人墓志銘

袁枚 錢唐

吾宗有節母曰韓氏孺人年十九來歸奉直大夫候選知州柳村公爲笄室事正室汪宜人甚謹內無違言生子一女一柳村與宜人相繼亡孺人嶷嶷守志教其子廷禱事嫡兄廷禎甚謹外無違行旣長爲娶著姓毛氏女乾隆四十六年三月孺人四十生辰廷禎廷禱謀所以爲孺人壽者孺人泣曰古稱嫗孀爲未亡人言當從夫而亡也我昔以撫孤故未亡則家人雖視我尙存而我之自視久已亡矣今日壽是逆我志而增我悲也奚可哉越兩月孺人果亡蘇州巡撫閔公請

旌於

朝廷禱以某年月日將祔葬孺人於奉直公之墓先期走幣來請余銘余宗人也又舊史氏也誼與職均不當辭銘曰

兌爲少女贊化坤方靈鍾韓姑降生吳閩婉孌莊姝令聞孔彰吾宗聘之嬪然成行克相良人鉤考家務場出廩入圭撮靡悞嘯不倚楹織常當戶金井微行從無亂步敬事民母燦忽毋虞煩捫衾裯漑濯盤盂丹心寸意二女同居人之視之如婦從姑一旦溘然所天不祿露紉爲鬢斂篋而襦曾曾稚子麻衣匍匐乃勤撫字息影

高樓手所拮据齊縷秦篝衣不采績饜不珍羞風晨花朝背人涕流一十五年志如一日教兒受經爲兒授室兒有至性孝行肫肫設悅之辰將召樂人將會宗親母曰嗚呼是豈余懷單鳧寡鵠不集春臺襖衣萑釵不稱金罍捐汝俗禮完我心齋昔我未殉爲汝童蒙今汝成立我事已終將往九京告於而翁果然是秋示疾不起玉女峯傾婺星沈矣頗似叔孫祈死得死今之良媛古之君子卜於剛日將祔佳城松兮比貞水兮比清爲衛其姜爲魯陶嬰千秋萬齡眎我碑銘

袁母韓節婦墓碣

袁穀芳 宣城

乾隆五十有二年予以公事留郡城寓紫陽書院一日有持刺而通謁于門者曰廷禱予同姓也適予他出未克見旣而再至三四至意甚下禮甚恭眎其色若有戚戚然者坐定手出家簡齋爲其節母所作墓誌銘見示且曰廷禱久聞先生名於簡齋所茲敢因簡齋以乞文於先生俾先母貞節得附大集以傳廷禱死且不朽先生尙憐而諾諸噫廷禱可謂知所以愛親而篤于孝者矣卽廷禱之孝而益可信其母之賢然則予又安忍以不文辭謹按誌節母姓韓氏吳郡人年十九柳村袁公得之副嫡室之適生廷禱甫六齡而柳村與其嫡相繼

亾母誓欲以身殉顧念藐孤在抱不見其成立無以報亾者于地下徒死不足以塞責乃遂制淚銜悲坐臥一小樓中所謂竹柏樓者是也蓋聲跡不下樓者十五年而廷禱果能讀書識義理且授室矣於是節母年四十廷禱與嫡之子廷樞謀稱觴於室博一日歡母聞嗚咽語廷禱曰若尙以我爲可生乎我自若父亾未嘗頃刻忘死也所忍死至今者以若耳今若幸成立我事畢矣可以踐夙誓報若父矣尙何用生爲語罷輒哭未幾病病遂卒聞者莫不嗟咨太息以爲匪獨其節烈也其於生死之際見之明守之確如有成算於胸中者蓋亦有

學問之意焉夫夫婦之道殉死情也撫孤義也節母始則以義而制情終則義盡而情亦盡得乎情之正合乎義之貞其生共死皆非偶然者廷禱痛母之死請於官得綽楔以

旌其閭未已也復遍丐於諸名士之言以揚厲其事蓋自簡齋而外如蔣少司馬元益有頌盧學士文昭王少司寇昶有記王光祿鳴盛有傳錢少詹大昕有銘梁侍講同書有贊彭進士紹升楊編修昌霖有序王太守文治有誄俱卓然可傳者其餘詩賦題辭出于名公巨卿者甚夥予因表節母而連類及之所以幸節母之有賢

子而節母雖死猶生云

竹柏樓居圖詩序

袁枚 錢唐

古丁蘭刻木像母未嘗非孝子思親設其裳衣之義然考之禮喪主用桑虞主用栗皆木也而刻木爲之是贅也漢武梁祠雕石像曾子之母杞梁之妻至今形猶宛然隸續所摩最爲近古吾家有節母曰韓孺人爲柳村公之造室其守志之貞教子之勤持家之謹余旣爲銘其墓矣其子又愷屬女史陸修梅追寫遺像作樓居圖梅竹鋪紛小樓清幽孺人坐其上穆衣蒿簪有睟其容想見當年紡於斯織於斯折夔畫荻於斯其章志貞教有家中人所不知而樓前之草樹烟雲無不知者宜乎

又愷抱臯魚之恨每一展卷未嘗不涕如梗糜也余又按曲禮孝子之事其親也視於無形聽於無聲此指其生前而言也在生前則雖無形而已有形矣雖無聲而已有聲矣若其親既已長逝而猶能課虛叩寂追取其形於丹青縑素之間然則覽斯圖也非特孺人之賢不可及而又愷之孝豈不加人一等乎世之方聞綴學之士肯寫宣懿美而加墨於斯圖者請從枚始

竹柏樓居圖序

彭紹升 長洲

喻節之高者必兼稱竹柏柏以言其有心也竹以言其有筠也極天下重遠之圖艱難困苦之業唯有心者能

以身任之以堅久持之其既也美在其中而暢于四支發于事業斯有筠之象著焉知有心矣勉自內制而不知所以化之其失也矜此苦節之凶也能爲柏而不能爲竹者也知有筠矣急自外暴而不知所以守之其失也蕩此不節之嗟也能爲竹而不能爲柏者也兼二者而有之乃可語于安節之亨也吾于袁母韓孺人見之孺人年及笄歸袁君森如年二十五而寡撫孤廷檮讀書娶婦坐臥一小樓垂十五年年四十值初度之辰子婦捧觴爲壽孺人愀然曰嗟夫吾事畢矣將從夫于地下矣何壽爲閱兩月遂以疾終夫死生之際人所視爲

至變者而孺人顧適然處之卒能赴所期以竟厥志卽
凡天下之變豈尙有足干其慮者哉若是者以有心守
之以無心化之其視十五年間猶旦暮也安莫安于此
矣卒之有子以昌其後有婦以宜其家无成代終利有
攸往不旣亨矣乎孺人旣歿廷禱追念罔極繪竹柏樓
居圖屬余爲序孺人之節余旣爲詩以紀之因又思孺
人之所以安且亨者于其所居乃適肖焉更推竹柏之
德以題其卷豈獨爲孺人誦之卽吾黨持躬涉世之方
亦宜深念乎此也

袁母韓孺人節行序

楊昌霖 元和

袁子又愷告余曰吾母韓孺人年十九而爲筵於吾父
奉直公生廷禱及女弟一人廷禱六歲而孤賴吾母拮
据海內者十五年廷禱授室未幾而吾母棄養矣惟吾
母生平飲冰茹蘖庶幾古之列女而所處則有更難焉
者敢請一言序之余夙欽孺人之節又於袁氏交厚爰
序之曰閨襜不幸而稱未亾人殉夫難乎抑撫孤難乎
曰撫孤難捐軀斷脰之竒行世豔稱之而感慨激發於
一時遂能播芳馨煒彤管若夫鞠數尺之孤後顧遙遙
之歲月擾擾萬緒如蝟毛而起而卒茹荼集蓼恩勤閔
鬻以潰於成故曰難也爲嫡而撫孤者難乎抑爲筵而

撫孤者難乎曰爲筮者難柔中而未得位則其道不可
以自專幸而所遇者賢事事善全其志而委曲調護之
苦心必有什伯於恒常者詩美戴媽而表其立心曰淵
曰慎誠有以窺其微也如是則又難方孺人之撫又愷
也丙夜課讀一燈熒然血點淚痕交垂胸臆亦謂爲母
之道應如是耳卒之有子克家焯然能自樹立如嚴霜
乍零木葉盡脫俄而暖律轉萬卉粲如涉大海顛頓于
洪波巨浪中其究也風正潮平瞬息千里於戲孺人一
弱女子耳所爲乃若是且又愷嫡出之兄啓蕃氏待又
愷曲有恩禮孺人亦命又愷父事之門以內無間言是

又孺人之行義足以感之而啓蕃念鞠子哀以長以教
不可謂非賢矣而或者以孺人之遽終爲嗇於數是大
不然夫孺人崑玉秋霜凜乎比質鄉黨式之志乘紀之
是其壽期頤不啻矣且孺人之沒也年適四十先是當
初度之辰里中有持羊酒賀者孺人却弗受曰惟願從
先大夫地下耳蓋其之死靡他至一瞑而始無苗髮憾
也夫孺人方以蓐螿爲沒寧而或者猶視爲不祿不亦
慎哉吾聞之造物者不報其人而報其人之天史冊所
載緣苦節而餘慶者不可覩縷數孺人於其難者易之
則造物於其易者亦何靳之有余是以知袁氏之必大

也遂書以復又愷

貞節堂序

孫星衍 陽湖

吳楓橋之西塘有貞節堂前閣學翁鴻臚爲

旌表節孝故奉直大夫袁君側室韓孺人所署名也堂外闐闐而內爽塏旁則引泉種樹左爲竹柏樓後爲五硯樓皆節母獨居課子及子又愷藏書讀書之地堂三間不崇不隘無磨礪雕績之巧不佞與又愷相識晚恨不及升堂拜母也又愷涕泣言母廿五而守節撫孤越十五年而歿方四十時爲乾隆之四十六年子婦等引時俗禮欲爲母以主一舉壽觴母舉古稱未亾人義却

勿御未幾母竟卒又愷痛母益甚徧乞當世賢士夫爲文以顯母節行彙一帙命曰霜哺遺音不佞時亦有母喪聞其言不自知其淚涔涔不止也孝經稱揚名於後世以顯父母不謂今之名位世之以科名官位達者不過奉告身張燕會以爲親歡誇耀閭里愚婦孺甚則忘身以及其親數典而忘其祖若是者一郡邑率有數人其身榮其後無聞焉今節母却壽觴不欲自顯卒得旌於朝又愷不汲汲求仕進以立身能文章名於世又推其孝思以及其祖藏先世書硯之屬以爲宗器使天下之士皆欲登其堂覩其先澤爲文以顯母之節行

若是賢子孫海內千不得一焉誠有合於孝經所云立身行道者宜不以綠野畫錦之堂之易斯堂也

貞節堂記

盧文昭 餘姚

傳云死而不亾者壽此固不以其年也如以年則上壽百二十中壽八十下壽六十此則世所謂壽矣若夫每閱十年遇其始生之日舉觴相慶世俗亦謂之壽此在人子愛日之誠綵衣承歡鞠膾致祝於事爲宜若已爲孤子而亦沿而行之知禮者固不之許也至於婦人夫亾之後而猶曲徇人子之請偶舉懸悅之儀議禮者曾未之及然由孤子例之則亦有所未安者君子取其大而不可責其細是以論或遺之若吳縣袁節婦韓孀人抑何其明大義也十九歸奉直公爲筵室其守志撫孤諸

事已見於諸名士之文今子廷禱旣狀其母之事實由所司以貞節得請

旌於朝乃卽以貞節顏其堂志

君恩彰母節也孺人四十初度其子亦欲爲母壽而孺人堅不許曰吾爲未亾人言當從夫亾也以爾等幼未卽亾實與亾等又何壽爲越兩月孺人竟亾吾以爲此正與昔人之所云壽者合也人生以百歲爲大期而能至者鮮卽至矣而無可稱亦與朝菌浮游何以異今孺人以一弱女子其節行得達於

九重而當代賢士大夫又咸樂爲之濡筆吮墨以發揚

之傳之久久其可得而薄餽乎夫以未亾而等於亾而孰知夫亾之爲不亾也卽慷慨辭壽數言可以作凡爲孀孀之準則可以補昔人議論之所未及故吾獨取此以爲袁氏之貞節堂記以別於他氏之貞節者焉

袁母韓孺人畫像記

王昶 青浦

袁子廷禱甫弱冠其母韓孺人歿於是袁子痛母之早見背也旣具事狀丐西莊光祿爲傳而以畫像屬予記之子攷孺人生平始也佐理家政克勤克慎則人誦其賢繼也茹荼集蓼撫孤成立則人誦其節賢節如是宜其享大年受子孫安養起居之報乃僅四十而歿年不

逮于壽命不稱其德宜袁子椎心泣血冀表其母之嫻
行皇皇焉而不能自己也昔伊川程子謂畫工所傳一
髮未當卽不得謂吾親而溫國文正公亦以圖畫非古
不載於書儀且圖像之留雖孝子慈孫什襲藏之而蒸
鬱之所斲絹素之所編往往未及百年漸至蠹敝若夫
劉子政范蔚宗所傳列女昭於經炳於史自周秦以來
其名益著勿衰洵有不繇年齒不待圖畫而傳者今孺
人旣得其可傳者矣奚復沾沾於是哉雖然叔先雄之
孝郡縣圖象于碑皇甫規之妻後人圖畫號曰禮宗蓋
象者像此者也精爽於是憑焉孝子之於親思其所嗜

思其居處手澤口澤之存且爲之悽愴惻惕況仰音容
以思笑語者歟繇是像也曩昔挽車提甕之勞荆釵裙
布之素與夫負書畫荻之教皆顯顯如在目前憫然肅
然必日引月長而勿替程子溫國之說豈足以概孝子
之心哉余又聞之明初葉士綸之母以貞稱部使者索
公廉知其狀趣州縣具文書吏以年未五十辭索公罵
曰有婦玉潔如此乃欲舉例耶卽爲按覆以上中書表
其閭事具宋文憲集中以孺人之賢節焉知無索公其
人不以年例爲拘特舉烏頭綽楔之典以慰袁子者余
固將載筆埃之寄語光祿亦當以余言爲非妄也是爲

記

竹柏樓記

楊復古

震澤

竹柏樓者蓋袁節母韓太君所居也太君蓬門淑質蘭
谷幽姿以李絡秀之芳年作袁柳村之筵室鹿車共挽
雍容佐織錦之機鴻案偕莊婉婉直條桑之院固久已
播聞中之韻事擅林下之美談矣無何而桑戶返眞蓉
城赴召鳳吹簫而先去鶴集柱以無期侶散文鴛夜臺
永隔歌成黃鵠宵幙徒懸太君悲鸞鏡之塵封痛燕梁
之泥落歸於其室矢同穴而摧心死也靡他向斯樓而
托跡嗟乎蕭蕭四壁未分鄰女之光寂寂一椽非爲仙

人所好雲浮西北罨鴛瓦而蒼涼日出東南映蠡窗而
黯淡齊女門邊之月夜照啼痕吳娃宮畔之霜秋吹鬢
影淒清幽幌時篝半爇之燈冷落承塵每繫獨歸之縷
遶砌則蛩吟自苦向隅而鮫淚常揮頻年蓼味茶香春
光忍見幾載梨花榆火寒食傷神蓋自柳村捐館之後
太君之坐卧斯樓者十有五年焉嗟乎春風暮雨兩言
傳毛鉦之詩晚翠寒香雙節附方洲之傳莫不揚徽簡
素扇美管彤比信國之樓居等袁閔之士室以今較昔
何多讓歟嗟乎九柳家之熊膽五夜含辛勤歎母之蠶
筐四旬週甲歡將菽盡還却稱觴憂不萱忘長虛御板

懷清有築空巋巴婦之臺幽窅暉潛竟化望夫之石應
是睠茲獨處見及黃泉可知此去雙棲歸同白首仙遊
路迥人往樓空矣令子又愷臯樹啣哀韋紗誌媿爰繪
圖以章德更卽畫以名樓願儀笑貌於青柯期仿音容
于碧幹從此竹貞其節永斑湘女之痕柏汎其舟式著
共姜之志構堂不墜金石同垂僕居僻楓江側聞芝範
仰霜筠之懿行待永以言挹冰蘂之孤標先成是記省
識探微妙筆圖披而遺跡常留懸知息影寒閨簾捲而
流芳未歇

竹柏樓居圖記

汪縉 吳縣

有樓翼然出於竹柏之間霜雪雜之寒塘遶之此袁母
韓孺人之所居也孺人年十九歸吳縣袁君森如舉一
子曰廷禱字又愷年二十五而袁君捐館於是孺人居
一小樓撫孤非歲時伏臘不下樓者凡十五年所謂竹
柏樓居者也於時又愷已授室矣孺人年四十子婦爲
孺人謀置酒稱壽孺人愀然曰吾今有子已成室家吾
之事已粗畢吾將從夫於地下何壽爲已而疾作遂卒
於樓中又愷痛其母之一逝而不返也思慕之無已時
也欲表其節於當世也乃俾畫師爲竹柏樓居圖以寓
意一時士大夫相與詠歌之又愷意未已也復屬予爲

之記又愷之言曰不幸吾母稱未亾人者十有五年食
蔬衣布如一日遇疾戒勿延醫廷禱以請孺人曰吾未
亾人也可使人診視乎終不聽治晝夜在樓中勤鍼紉
非漏下數十刻不休子婦請休孺人曰此老婦職也其
可怠耶亦不聽獨居時哀痛常形於色遇祭祀必流涕
家有讌會背人每嗚咽不勝性慈和有容家人無間言
視子婦則愉愉奴婢未嘗聞高聲每命廷禱事兄如父
以故終孺人之身內外雍如此廷禱請記之意也嗚呼
孺人之節美矣又愷之孝思亦可謂不匱者也爲記之
并繫以詩其詞曰

有竹叢止有柏茂止有樓有樓塘之右止有竹筠止有
柏心止有媛有媛德如琴止有竹霜止有柏雪止樓中
有媛凌霄節止

袁節母韓孺人贊

梁同書 錢唐

星紀吳分度八女宿須女四星貫魚先後吳有節母佐
嫡以筵織素寒宵佩蘭清晝哀哀寡鵠悲失其雄所不
卽殉遺孤幼沖孤長授室得遂初衷春卻壽卮秋焉告
終綽楔烏頭死而不死誰其銘幽曰簡齋氏以袁徵袁
其詞卽史邈矣女宗勗哉令子

袁母韓太孺人遺像贊

并序

黃軒 休寧

蓋聞巾幗能扶名教弱齡之勵節原難縞綦備歷艱辛
側室之撫孤猶苦如袁母韓太君者柳村袁公之副室
也夢斷三生心堅百鍊玉壺凜冽冰凝食蓼之心寶鏡

昏霾愁積飛蓬之鬢猶憶鳳簫作合勤劬而挽鹿同勞
迄乎賦鵬人亾慟哭而撫棺嘔血矢柏舟之素志非無
誓死之心思易簣之遺言願荷未亾之擔時則幼女待
哺傷心雪撲麻衣孤子六齡慘目風寒蘆荻顧影則誰
爲慰藉病骨摩挲指心則默誓艱難虛懷盡禮雁烟蛩
雨登樓獨守昏黃蓼味茶香入室還捺白雪迨至十年
就傳停梭開憶父之書五夜清燈剪燭拭課兒之淚此
所以板輿來往垂楊巷列東西堂構勤勞花萼樓開南
北宜其作璇閨之模楷褒

聖世之絲綸乃鳳毛快睹堂前稱介壽之觴而鶴弔旋
臨室內化望夫之石想紡績於春風曲巷無人自課女
紅讀蓼莪於夜雨孤燈有恨頻拈珊瑚管天憐清操未酌
黃髮遐齡節重守真待賁紫泥封

詔紀芳徽於今日敢云健筆縱橫傳月旦於他年忍使
貞修湮沒也哉贊曰

易稱坤德無成有終匪逢其泰而覲其窮匪豐其境而
嗇其躬不以顛而施其擔不以躓而惰其功旣志堅於
金石自立極於女宗繪慈雲於績室瞻璧月於璇宮展
生綃以尋覽恍睹敬姜之範冰雪之容

袁節母竹柏樓居圖贊

吳俊長洲

嵐凝西嶺波委東塘人家水上門第路旁袁氏之樓謝
雕崇素皓魄棲欄清飈拂戶伊誰居處節母韓氏襖衣
萑簪練帟竹筥貞柏勁理苦竹蒼筠望廬起敬睹木思
人其人既死雖死宛存依稀圖畫無笑有言當年寡鵠
單棲小樓竹爲奴婢柏是侶儔爾識之無長來頭角宵
伴母績晝從師學洎乎有室宗祧是憑洗卮獻壽製錦
萃朋孺人樓上與竹柏語謂竹節堅謂柏心苦茹苦鍊
堅竹柏之志志遂身安死生無二大好西方去來了了
蕭灑形骸從容綦縞從來節義晝荻丸熊疇能筵室永
矢有終柏綴嚴霜竹零秋雨孺人之樓僊人之宇畫像

非古思親是孝千古臯魚傷心同調

竹柏樓贊

程思樂 漢陽

以竹比節莫喻其高以柏比操莫喻其勞曾樓居十五
載而守彌堅而志益牢人皆頌賢母之大節無虧名克
垂夫金石吾尤愛令嗣之孝思不匱情具見夫歌謠以
故上至卿尹下至吾曹靡不或銘或傳或賦或騷載揚
令德共仰清標嗚呼此之謂一門節孝當代英豪

袁節母韓孺人象贊

并序

汪亮 閩秀

節母韓孺人守節撫孤年四十而化至今丙午清和月
孝子又愷氏以傳銘及畫像寄示丐余作畫像贊且余

深愧無文詎敢濫叨聲華之末固應却之爲遽然捧讀
當代大人先生琬琰鴻篇頗悉孺人畢生之操乃高行
女宗仰茲正氣所鍾曷勝肅然起敬不辭固陋援筆而
贊曰

坤輿毓秀降自吳閭幼嫻壺範婉彼端莊嬪於望族雍
穆閨房同心比德蘭室增光云胡不造折柱積梁媿嬰
厥殉歲月惟傷撫孤獨任慈訓大綱惠頤冬日操秉秋
霜周賢絡秀衛美共姜懿行淑慎鍾郝遺芳壽曰不惑
常棣稱觴承先啟後願畢北邙夢沈五夜機斷七襄牛
眠是卜純孝克當猗歟令器風樹難忘鶴應感弔旒以

名揚古有鏤像今則圖方宛然形韻流澤彌長千秋彤
管億世典章我依實蹟有槩有詳

貞節堂銘

并序

錢大昕

嘉定

奉直大夫袁柳邨先生之次配韓孺人以節行奉
詔旌門閭其子廷禱承慈母訓誨感

朝廷恩渥爰作新堂顏之曰貞節翰林侍讀學士餘姚
盧公文昭旣爲文記之而廷禱復請余作銘刻之堂側
袁氏吳中甲族自六俊以來文采風流照映志乘孺人
復以柏舟貞操增輝彤管廷禱孝思不匱時以表章先
德爲任栢棖之慕久而不忘洵哉非是母不生是子也
迺爲銘曰

六俊餘芬古堂翠峯粵惟柳邨實鍾名德中壺贊治爰

資筵室龍蛇示夢堂在人歿卓哉孺人砥厲苦節飲藥
茹荼餐冰齧雪坐臥小樓周遭竹柏繆幕麻衣足不踰
闕霜夜鵲啼聲和刀尺顧影煢煢遺孤在邇慈仰九熊
嚴兼晝荻十有五年常如一日身雖未亾兒已成立初
度祝嘏堅辭啜泣從夫地下已矣終畢周李陶湛先後
齊轍令子篤孝追念情迫貞節名堂永識無斃我作銘
詞俾刻堂壁松心竹筠千秋炳烈

袁母韓孺人誄

并序

王文治

丹徒

奉直大夫候選知州柳邨袁公之筵室曰韓孺人以乾
隆四十六年閏五月六日卒於寢嗚呼哀哉孺人生於
乾隆七年三月十一日年十九歸柳邨公事正室汪宜
人甚恭謹柳邨公與汪宜人相繼下世孺人守節撫孤
內外嚴肅事詳家西莊光祿所立傳殆女之有士行者
宜爲之誄誄曰

獨鶴警夜貞松秀冬哲人寓世寄達於窮相彼南國女
星實鍾清風介節管煒於彤維韓孺人幼標淑德嬪於
袁氏婉嫺足式相夫事嫡其儀不忒乃生令子孝恭維

則繫惟袁氏世有達人洎奉直公懷材欲伸圭璋甫琢
芝蘭闕芬梁木旣殯庭草弗春公之伉儷相繼下世公
之冢君瑚璉國器煢煢婺婦依依弱弟纘考友兄荷擔
匪易孺人矢志如月麗天青霜之皎白玉之堅以燕翼
子惟曰能賢吹墳及篋仲後伯先有遠者閣爰居爰處
病謝藥餌服屏紈紵花晨含淚月夕增楚十有五年不
聞笑語壽屆四旬衆議稱觴孺人弗許爲陳大綱婦失
所天古稱未亾譬彼菘菘厥心孔傷嗚呼哀哉青鸞馭
騰素蟾輝闕玕璜聲杳機杼韻絕慈如春和嚴如冰潔
親串淚雨僕御涕雪古者誅德記傳是資女宗弗遠母

儀在茲令子純孝徵銘乞詩余忝舊史爰勒是辭嗚呼
哀哉

跋貞節堂卷

錢大昕 嘉定

袁子又愷承節母之誨讀書敦品克自樹立陟配之慕
久而不忘既繪竹柏樓居圖乞名公題詠裝成兩卷茲
復以誌銘傳贊諸文次於遺象之後而以翁閣學所書
貞節堂三字顏於幀首太孺人之貞心又愷之孝行不
獨汝南一門流芳亦三吳盛事也予嘗見宋槧列女傳
以顧愷之圖象與向書相附而行而武梁祠石室亦刻
梁節姑姊京師節女諸象漢史載金日磾母圖象甘泉
宮則圖象自漢有之與禮家愛存懋著之義固相脗合
明初錫山華氏春草貞節兩卷皆名流翰墨朱性甫鐵

網珊瑚具錄其文又愷之行誼視華氏有過之而卷中
詞翰亦不減前哲後有續性甫之書者亦將有取於斯
矣夫乙卯七月十二日

賦

竹柏樓居圖賦 并序

蔣 棠 元和

竹柏樓居圖賦者爲袁節母韓太君作也太君蕙心婉
嫵蘭抱幽貞運錦杼於機中播芳風於林下時則奉直
大夫柳邨袁公築室於楓江之西桓少君爨汲之暇爰
造鹿車臯伯通杵臼之間實襄鴻案蘋藻斯潔芣苢遂
歌亾何黃鵠夜鳴青鸞晨掩劉綱夫婦竟仙去以不還
鮑家女宗矢貞操以彌厲蓋大夫與其配汪宜人相繼
厭世太君則鉛膏弗御冰雪爲心坐臥斯樓十有五年
未嘗踰榻斯時也萼愁月泣篆燼香銷承塵無並宿之

巢窳砌有獨搖之艸石有情而將化井不水以何波洎
乎密密縫衣青青畫荻殘燈如豆憑牖下而課經斷髮
爲髻在中饋而具饌於是令子廷禱嶄然頭角侗乎珪
璋旣冠且昏請前爲壽而太君蓼偏集苦葢不忘憂顧
苦寢以腸摧掩素幃而淚寫拒而弗許誓以相從遂未
幾示疾卒於樓中焉嗚呼星妃天上合住珠宮玉女峰
頭自開瑤閣憂龍孫於碧地飄來微鈔之音舞鸞翠於
旃林散作曼陀之雨尠是樓居已如夢泡矣而廷禱痛
深慈教永戀春暉入室日瞿趨幃魂斷爰倩畫師作爲
斯圖而屬余以賦嗟呼嚴霜皎日千秋剩說懷清文梓

貞松終古爭傳高行風徽斯在簡帙餘芬則是圖也竹
皆染血請觀湘水之濱柏可爲舟便繼鄘風之作其辭
曰

夫何斯樓之竦峙兮鬱隱映乎西郊襟蓉江之通波兮
裔楓溪之迢遙外嶽峯其孤撐兮中樸屬以不雕雖洵
美而匪崇侈兮貴特遠乎囂紛棟梁叅差其無藻兮櫺
楹闐其凝塵帷幙勿設夫綺組兮庭卉擢秀而自欣繁
竹柏之環植兮挺貞柯以凌雲有一人之塊處兮稟亮
節之惓惓美要眇以嫺禮兮羌好修而無言搏若蘭以
爲佩兮拊堇荼而彌甘爰密覲以端處兮猶別微而防

嫌肅不聞夫警欬兮時自嚴乎顧瞻左卷軸而右機杼
兮曾不遑乎櫛漱鞠曾曾之幼稚兮手詩書以口授思
貽君子以令名兮常秉燭而繼晷懼或隳夫清芬兮俛
地下而遺疚日荒荒其西匿兮仰視衆星之垂芒愁雲
滃以入戶兮涼風慄兮襲房唳孤鴻於簷角兮金井復
嘯夫寒蠶鐘流響於山寺兮白月下乎曲廊涕橫迸而
不可收兮引篋篋兮不能長慙獨徂此芳歲兮浹一紀
與三秋何烏兔之邁盡兮愍抱疴以彌留持峻坊而拒
診兮慰夙願兮焉求庶無讐於禮義兮終畢命於茲樓
竹斑斑而泣露兮柏慘慘兮含感素帷飄而襜襜兮簾

櫛淒兮變色緬提命之在茲兮循房阿以想所歷天高
而難陳兮痛悵悵其何極托絹素以肖形兮聊以識夫
遺則冀貞履之憑依兮謹衰弄兮期不謫伊圖像之爲
功兮詎前型之未聞仰劉范之紀纂兮悅炳炳乎目前
彼禮宗之爲繪貌兮勒貞石而弗諼矧孝子之摯思兮
將以眎乎後昆良不盪於古義兮抑有裨於勸敦亂曰
維竹之筠茂猗猗兮維柏之心貫四時兮猗樓中之人
兮行與之齊兮竹枝之修兮勁節久兮柏幹之樛兮霜
皮黝兮猗圖中之樓兮千秋萬齡終不朽兮

竹柏樓居圖賦

金學蓮 吳縣

高樓兮無聲幽人兮亭亭虛幃靜而寂寞羅袂冷而塵
生良人忽以捐背泪漉漉而傷神聽哺烏於月夜驚孤
鴻于霜晨葉蕭蕭兮勁秋草緜緜兮芳春春復秋兮十
五載兒成立兮母心寧母心兮安寧母節兮堅貞風高
兮雪白霜滿兮煙平惟樓前之竹柏常落蔭於空庭

霜哺遺音卷二

隨題隨梓不敘爵齒

詩

袁節婦詩

有序

彭紹升

長洲

袁節婦韓氏吳縣奉直大夫袁君森如之側室
也年二十五而寡撫孤廷檮讀書娶婦乾隆四
十六年年四十矣其年春三月生日子婦舉觴
爲壽節婦愀然曰嗟夫吾事畢矣將從夫於地
下矣何壽爲已而果然距生日兩閱月耳因歌

其事

弱歲爲君婦明姿耀華妝聞雞請沃盥當食調羹湯何

以祝夫子俾爾壽而臧春歸花不留秋至月已涼一慟
作死別泉路空蒼茫顧此藐諸孤食息須扶將黽勉日
復歲忖量短與長成童且及冠授室年相當珠履爭合
沓瓊佩鳴鏗鏘婉婉彼姝子入門拜姑嫜發春開四表
兒婦齊稱觴愀然顧日景陳意何軒昂夫在日經天弱
草同陽光陽光一淪沒弱草餘寒霜枝葉已枯盡寸根
終自香分將委大化一任從風颺斯言竟終古明信誰
能忘左邱貴知命柱下先知常不二乃不迷寧論存與
亾懿好在戚里抽毫遂成章書之古彤管高義爲民坊

輓袁母韓孺人

王鳴盛 嘉定

頌椒題茗著微儀堵口惟殷膝下兒臺築懷清標節槩
弦彈別鶴矢心期悅辰弗御流霞琰翠石宜鐫幼婦詞
寸草春暉真莫報素幃風肅愴含悲

又

秦大成 嘉定

淑慎璇閨範羣欽絡秀名辛勤成弱子隱忍寄殘生玉
樹當春茂

龍章賁誥榮藁礎差可慰素志克全貞

小閣薰香坐清規玉不如家翁經久別死節敢忘初畫
荻心何切離鸞怨未舒返魂今斷藝無計輓靈車

又

曹謙光 元和

四十年來搵行芳名畱彤管頌南陽相將樛木甘同穴
並望芝蘭發異香半鏡交愁辭粉澤一燈坐對泣筐牀
淚痕染徧瀟湘竹鷓鴣聲中去渺茫
地臘重逢天再中芘芘花發五更風庭階昔歲諧鳴鳳
堂戶今宵聽斷鴻四秩籌添辭介壽一朝鶴駕赴瑤宮
天閭叫絕魂難返愁看江村兩岸楓

輓柳村從孫淑配韓孺人

袁照元和

歸周早仰識非常黃鶴吟成節更芳
綸誥遲分

丹鳳闕鸞車遽返白雲鄉空餘懿範輝彤管無復徽音

著北堂寸草春暉情罔極晨昏淚灑蓼莪章

北阮居停歷有年深知壺德百無愆蘋蘩謹恪襄中饋
熊羆辛勤啟後賢廿載貞心堅鐵石半生苦節凜冰淵
蕙帷一夕悲風起惆悵音容托白蓮

袁節母韓孺人詩

覺羅長麟

余與君家春圃方伯爲寅友丙午秋

簡命監臨闡試迨藏事與余道及吳中風土清
嘉并爲述族中韓孺人苦節甚詳今其子廷禱
出傳誄索題余嘉其能表揚母節也因記之而
系以詩

孤芳誰識魯陶嬰
灑涕當年解珮纓
荻教辛勤成楷畫
樓居寂靜著幽貞
採風行紀南邦美
旌典還邀

北闕榮風仰高齋
曾臥雪於今綽楔表冰清

烏哀三章爲袁節母韓孺人賦

邵 颯 山陰

有烏哀止有木摧止
感雅烏之實哀願言懷止
嗟嗟泉下之人兮不我偕止
呱呱者泣匪妾敢子實先大夫
嗣子伯兮仲兮偕進偕止
毋念爾考妣 雪其霏止霜
其淒止霜兮雪兮十有五祀
以翼我孤子從先大夫于
九原兮吾自樂死

袁節母韓孺人詩

孫志祖

仁和

孤松冒雪榮慈竹
凌霜茂吳中有賢媛
姆教稟自幼婉
嫵歡同居白頭期
共守膝前育鴛雛
早卜文采就何圖
喪所天驚颺昏白
晝撫孤與殉身難
易理洞究蓬鬢謝
鉛華縞衣媿綺繡
樓居十五年一經
親指授飲冰復丸
熊辛勤締堂構恰
值設悅辰子婦稱
觴壽母色慘不怡
未亾人在疚敢以
舞綵新而忘涕痕
舊向平願已畢此
正沒寧候迺反稱
慶爲於理固大謬
寶婺忽沉輝鸞驂
肯暫逗生死兩無
慚誰云天不祐褒
德列管彤莫罄詞
翰富煌煌樹綽楔
庶表閨中秀

貞節詩爲袁母韓孺人作

湯脩業 陽湖

黃鵠歌殘淚滿衣無窮懿行集慈帷娛賓鄭重難留髮
訓子殷勤好斷機自有喬松森晚翠從教寸草報春暉
聖朝表節恩眞厚綽楔 旌門願不違

題袁母韓孺人節孝傳後

張熾 仁和

離鴻調古寄酸辛廿載操持潔白身寶鏡缺殘寧是月
琉璃居處更無春階前種玉承先澤地下尋夫了夙因
半世堅貞逾竹柏欣看淑範勒貞珉

袁節母韓孺人遺像題詞

彭啟豐 長洲

猗袁氏之六俊兮表清芳于東吳旣雲初之不替兮亦

彤管之有譽惟中閨之令姿兮望三星之在隅佐內職
于蘋蘩兮鏘鳴珮于瓊琚乍棟撓而木壞兮擬身殉乎
幽都顧藐孤之誰屬兮聊偷息于斯須弔孤燕于空梁
兮種蕨草于庭除愴歲月之如馳兮降西階而稱姑屆
四秩之初度兮貯春酒之盈壺忽愀然而顧影兮將抽
身而返故居何輕塵之堪戀兮向淨域而長趨畱清芬
于遺像兮索音響于畫圖謝鉛華之粉飾兮斂愁睇而
未舒空結想于杯棬兮履霜露而長吁借藜光於太史
兮垂金石而弗渝緬懷清之高築兮長流芳于五湖

竹柏樓 并序

顧光旭 金匱

竹柏樓者吳門袁節母韓孺人之所居也節母
既以賢節聞而吳中士大夫作爲詩歌銘誄傳
記以傳其芳聲而仰其遺躅民之秉彝好是懿
德斯之謂矣昔余從兄諤齋氏嘗撰列女樂府
凡五卷益以補遺一卷共六卷採集經傳搜羅
令史摭摭甚詳且備凡賢能有節行者咸在是
列然耳目所及者及之耳目所不及者歸於補
遺并不敢信補遺之外無遺也聊俟諸異日之
再補云爾惜書垂成而吾兄歿不果付梓設吾
兄聞孺人之賢如是孺人之節行昭著如是其

必爲樂府入補遺卷中矣余乃不揣固陋欲以
耳目所及一一補之異日采風之使或合前卷
而付之梓則吾兄之志也爰作竹柏樓

節母賢不卽死伊何爲撫厥子節母賢儵已死伊何爲
子娶矣柏有心竹有筠登其樓虛無人竹柏樓長洲苑
心匪石不可轉心匪席不可卷竹柏影淒以斷謂如在
邈河漢嗚呼孝子哀且止君不聞母也天只四更月出
上樓來琅然竹柏清風迴

袁母韓孺人竹柏樓節詩四絕

黃國楹

江寧

愁聽吳門竹柏樓孀居苦節歷春秋年來素志誰爲伴

柏似清操竹似幽

歐陽母氏有孤兒荻晝長從閫內施想到樓中霜夜月

更深猶是課書時

厲志堅貞十五年佳辰設悅祝尊前誰知頌嘏稱觴候
已卜蒼梧淚竹天

彤管揚清在玉京芳徽天下已傳聞從今烈女篇章後
應有冰霜誌節文

竹柏樓詩爲袁節母賦

蔡元春 上元

冉冉孤生竹青青陵上柏竹柏得其真四時不改色吳
門有賢媛高樓守純白自昔事君子其儀稱不忒一旦

失所天血淚常沾臆自稱未亾人飲冰供婦職君子有
適子負才故殊特黽勉帥以聽內外旣匡飭君子有仲
子鞠育不餘力匪云昵所生竊比古晝荻樓端飛嚴霜
樓中懸明月他年紀女宗千秋以爲則庶幾懷清臺與
樓同百尺

又

俞葆寅 仁和

繞樓竹數竿當樓柏千尺誰歟居此樓共表凌霜格卓
哉大夫筵室韓華年守貞形影單扶持嫡嗣閱艱難撫
孤成立家室完從夫地下心情安乃知孺人持身具定
識死生惟視義所適生前素志傲冰霜死後清操逾竹

柏迄今音容杳渺珮環遙樓上年年孤月白

又

項壩 錢唐

柏有心兮竹有節心似石兮節如鐵那畏嚴霜與朔雪
阿母登樓情脈脈秋蟀春鷓凡幾易樓外何所有白日
皎皎天明明樓中何所有雜誦聲與練軒聲兒能克家
母心悅壽日何須悅惟設此生之死矢靡他旋得疾兮
遂同穴茲樓千載傳吳中至今來往惟清風登樓不下
昔誰比所南老子將毋同所南老子將毋同母之苦節
翁之忠精誠上與神明通會見日星並揭無終窮

又

許寶善 南匯

風淒淒兮雲幽幽白日杳冥兮竹柏樓孤鴻聲哀兮寡
鵠怨樓中人兮心煩憂冰弦絕兮寶鏡破欲往從之兮
泉下路悲呱呱之襁褓兮重踟躕忍苦含酸兮繫子之
故十五年兮須臾我志畢兮敢愛我軀從容長逝兮爰
從夫子嗚呼魂去而樓存兮扶綱常於不死

又

金鳳翔 元和

淒淒復淒淒高樓烏夜啼中有袁家婦聽之心傷悲十
九爲君婦廿五忽分離昔爲鴛鴦鳥今爲風霜枝風霜
幾回換白首不相見牽牛與織女迢迢隔河漢河漢清
且漣樓居十五年流光驚逝湍一去不復還浮雲卷長

風高山變深谷良馬駕輕車中途折其轂女子各有夫
夫死寧愛軀欲死而暫生有子啼呱呱唯母顧忍
生爲此故春風柳花飛賤妾淚沾衣斜日照樓上相對
魂依依秋光滿閨闥賤妾入機織空房絡緯鳴終夜不
得息妾有繡羅巾回頭光彩新自從良人沒藏篋不上
身誰言妾有夫棄妾夫先歿誰言妾無子子大母可死
磊磊秋礪石漑漑古井水子也石之安母也水之止三
月四十辰日暖高堂春上堂拜阿母兒當爲母壽阿母
謂兒曰昔爾年方幼今爾已成人唯我亦無負辟彼園
中瓜落實歸山阜辟彼江口船涉險且堅守如何出此

言孝養竟不久詩人比共姜貞節毋相忘天風激清響
江雲浩茫茫寒塘唳孤鶴聽者徒傍徨至今竹柏樓明
月飛寒霜

又

袁鴻魁

吳縣

茹蘖飲冰十五年樓居竹柏表貞堅

榮褒綽楔

綸音錫青簡流芳奕葉傳

吳中節母萃吾家曾捧

龍章麗彩霞

余伯母徐碩人苦節二十七年已邀
典李客山先生爲之立傳載入郡志

旌

竹柏樓頭

丹詔下後先輝映比霜葩

籜石前輩寫竹柏二圖表袁母之節且以慰賢子
之心可稱畫史余因各系以詩
王文治 丹徒

維竹乃有筠維竹乃有節筠潤發華滋節高無屈折清
風在人間百世殊未歇
武侯祠裏嚴霜色節母樓頭苦蕪心直幹去天如尺五
空中時發水龍吟

又

潘奕雋 吳縣

危樓清延風翠竹勁含淚莫道霜飈寒雛鳳看呈瑞
脩影月蕭蕭孤根雪不彫孫枝新沐雨一宿欲凌霄
叢篁自有筠古柏自有心虬枝撐雨勁黛色參雲深侍

郎老腕健筆挾風雷音干春香葉底恍聽孤禽吟

霜哺遺音題詞

趙翼 陽湖

斷鴻啼老九秋霜竹柏樓高不下堂自課兒常宵剪燭
未亡人敢壽稱觴飛瓊遽返星河杳絡秀終垂史冊光
誰謂

旌門格年例貞珉已見築崇坊

又

毛藻 江寧

吳中袁節母韓孺人守志撫孤上邀

旌典縉紳先生多爲傳誌詩章道揚芳烈前後
哀爲一集余受而讀之竊哀節母之志而更幸

其有成也爰爲歌曰

維皇併幪萬類兮詎獨因此婺婦始爲筵於清門兮卒
玉成而爲節母 節不難慷慨於一時兮惟難從容以
後死遽捐軀以報藁砧兮顧藐孤其誰子 鞠育辛劬
之十有五年兮夜搏穎以籲天迨其成立以有家兮從
良人於九淵 子甫壯而授室兮將捧觴爲母壽母倏
忽驂鶴而上征寄晨羞於俎豆 瞻遺像以椎心兮於
舊棲之層樓斯霜筠雪柏之與母同貞兮靈髮髣髴其來
遊 繫栝椽之抱慟終古兮維烏私之難恕無已則泣
陳珠庭兮酬母德之萬一 幸

恩綸之下逮兮表綽楔於中達回首哺雛曾幾日兮原
冰蘖之如飴 母懷何心於身後之榮兮亦旣令名與
忠義同稱年四十而千禩兮信彤管之有徵

讀袁節母霜哺遺音題後用家耘菘先生韻

趙懷玉 武進

修竹凌寒柏負霜樓前春任去堂堂撫孤成立未踰柵
祈處從容肯受觴

旌典特頒真

異數士林爭誅有餘光臯魚風木終身痛廣孝行看別
置坊

題霜哺遺音集

孫傳曾 仁和

柏舟矢志繼共姜哀感餘生却壽觴聯萼棣華承曉露
隻飛巢燕泣清霜事傳中壘千秋筆詞愧南豐一瓣香
蔣時菴少司馬為余座師首為孺人作頌

綸誥九天酬苦節靜看彤管字芬芳

又

朱文藻 錢唐

中郎世澤衍

熙朝慈孝留貽卷軸饒霜哺篇傳前代著遺音事待後
賢昭徵君妙蹟題名在節母貞操綽楔標身後生前均
頌美屬辭但愧筆難超

又

朱家濂 仁和

節母筵於袁恭謹事大婦柳村尋繼亡樓居勵清守六
齡嚴受經勤劬授室後四十轉愀然嫗孀却置酒樂頌
孺人賢追憶吾祖母大節晚旌門抱孫時在手得年躋
八旬涕淚辭稱壽素志願從夫情與孺人偶誦銘重有
感感歎不容口賢嗣廣孝思採言培蘊厚

又

何琪 錢唐

芳閨早歲著和柔鍾郝由來禮法周鵠寡無他惟有死
熊祥已兆更何求機聲軋軋冰霜夜燈影搖搖竹柏樓
懿範不煩彤管紀姓名會見表烏頭

又

王富學 吳縣

余居西塘時漁洲袁君晨夕過從常稱道其庶
 母韓孺人之賢謂其弟又愷循循有規矩勤於
 學樂親正人皆韓母教也及韓母卒漁洲爲之
 服期喪致敬盡禮重賢母也未幾漁洲捐館又
 愷盡傷於心撫孤姪恩義懇摯鄉黨宗族咸嘖
 嘖稱之而向之稟承於賢母之教者益驗矣夫
 爲母者孰不欲其子之賢然惟子而能賢斯母
 之賢乃顯又愷洵能顯其母者哉茲以霜哺遺
 音索題余極欲附名簡末而愧不能詩因卽集

卷中諸君子句爲七律一首以應

修竹凌寒柏負霜

趙中翰
懷玉

小樓獨弔影

尹閣學
壯圖

涼相將

木甘同穴

曹明經
謙光

不受春風晉彩觴

徐女士
蘭韞

令子能彰賢母

德

蔡孝廉
曾源

貞珉已見築崇坊

趙觀察
翼

心傷十五年申事

朱廣文
黼

當代名公聯鉅章

張女士
秉彝

又

程 雯 休寧

臥雪高風衍澤長
 女宗懿範頌南陽
 應知佐室勤機杼
 自合宜家響珮璜
 一旦離鴻悲絡秀
 六齡弱息恃共姜
 青鐙對泣時相慰
 小閣孤吟景亦涼
 霜荻畫教凌曉課
 熊丸和就曙更嘗
 如何夫去難同逝
 却爲兒存忍遽亾

紅縷情深纏海燕淚痕色染感湘篁清逾冰雪肝腸冷
勁似松筠節操剛漸看雁行分伯仲旋瞻子婦拜姑嫜
親朋慶擬開筵祝母氏情酸却壽觴爲道摩笄心已燼
何來設悅念增傷願言式好音猶在矢死靡佗志克償
渺矣慈顏無復睹愔然夢想怎能忘烏私徒歎星河杳
石化期垂史冊光
旌典恩綸昭壺德採風淑行播吳閩蓼莪詠罷情何極
人自爭傳貞節堂

題貞節堂卷

阮元儀徵

韓姑昔待字相攸筮袁氏女君絕愛憐左右若兄弟黽

勉輔內政徽音濟其美一朝失所天遺孤六齡耳女君
相繼沒隻手復誰倚一慟逝欲殉撫孤義難委勉強治
食事揮淚脫簪珥育子之閔斯子也見鄉里授室事乃
畢任重此可已四十初度日子婦奉觴醴春暉寸艸心
冀博慈顏喜母聞慘不懽孺子逆我悵夙昔稱未亾從
亾志每矢身在心早殂一十五年矣藐孤幸長成吾欲
侍君子其秋示微疾奄忽遂不起求仁而得仁祈死竟
得死無成代有終不媿古女士所以
旌其門述作紛可紀

題竹柏樓

馮鼎高

楓江有高樓竹柏凌空翠中處未亾人形影伴顛顛十
九遭清門秉姿貞且懿小心事民母黽勉佐中饋華寢
初將雛俄驚風雨至鬱鬱孤禽啼熒熒外戶閉從茲十
五年永矢鉛華棄織縑愁如絲九熊和以淚芝蘭自有
真璠璣琢爲器婚嫁事麤了從容畢初志卓哉賢母賢
鬚眉行無媿我來守此邦聞風仰高誼綽楔膺
崇褒巍峩表門第濡筆賦彤管敢忘有司事

又

史善長 吳江

秋陰瑟瑟雲氣涼哀烏夜叫霏繁霜十年泉下結隱痛
制禮易闕恩難忘弱齡孤露覆巢翼賴有賢母躬扶將

映燈句讀必自授折荻點畫粗能詳咀熊知苦複襦暖
一髮欲繫千鈞彊靡筭豈負同穴誓惜此保抱稱未亾
小樓坐臥扃清晝勁柏鬱翠貞筠香可憐拮据心力盡
十五斗柄回東方乍忻佳婦正贊醴况值元日宜稱觴
微生幸存已多愧後死塞責夫何望瑤池青鳥忽西去
墓木慘澹風吹楊永言至孝久勿替音容棖桷思彌長
卽今乞句半耆宿卷軸觸手皆琳琅已邀

曠典厲貞行更被特筆揚幽光半生鞠育得賢嗣含笑
入地名逾彰何人紀之牒史館是母是子維綱常

又

李賡雲 嘉定

樓下斑斑一叢竹色染湘江帝子哭凌冬不凋春不綠
樓前蒼蒼一樹柏黛色霜皮若干尺伐以爲舟良可惜
竹柏樓高高入雲誰其居者袁太君將雛哀鴈單無羣
太君心似古井水一十五年不露齒斲雨零風共終始
收孤成立爲其難崢嶸綽楔浮雲端一朝含笑歸廣寒
藐孤旣長孝且文讀書好古精於勤名士允矣香堪熏
我聞君名面未識誦霜哺音心惻惻雖不工文意難默
吁嗟瘁意難默文不工官非史管弗彤姑爲下里詞寄
與袁山松

竹柏樓詩

吳錫麒 錢唐

竹柏樓頭烏夜啼竹柏樓上寒淒淒孤生自向秋風直
側葉寧教凍雪迷袁家阿母樓中住一十五年駒影度
汎汎如舟魂共搖稜稜有節心彌固可憐絕調唱單鳧
可羨貞操耐苦荼矢志何論遠氏筵全身終撫趙家孤
剖楹但願書香續獨自鳴機課兒讀酸聲併入風雨愁
虛盪涼燈一絲綠坐臥頻年不下樓與兒形影互相酬
仙人漫說居原好去貞女惟應名共留兒今授室兒有
子兒今讀書富經史荻畫難尋灰已殘紡車猶在絲誰
理行年四十苦侵頽兒請稱觴祇益哀那要觀優召魚
里竟甘同穴赴泉臺母志旣完容亦杳賸有兒心悲未

了豈無像勒武梁祠豈無文紀瀧岡表榮衰寵幸荷
恩綸嘉頌尤聞遍搢紳古井常餘不波水千秋如見未
亾人此樓兀兀今如昔此節高於樓百尺虬枝鳳幹交
撐扶地久天長視竹柏

霜哺遺音卷三

隨題隨梓不敘爵齒

詩

題竹柏樓居圖

錢載秀水

汝南詩禮宗秀靈鍾淑嫿矧復彤管煒冰霜共澂潔孝
行旣無愆餘烈尤足式令嗣播芳馨清輝寫昭質巍巍
竹柏樓端操尋遺迹竹修表貞堅柏勁挺孤直千秋嗣
徽音永爲女史則

又

周元理吳江

維竹有筠維柏有心晨風自淒莫雪載深一竹兮柏兮
乃利女貞風兮雪兮聊以懷清二解粵稽鍾郝遐哉徽音

庶克嗣茲珩璜長欽三教授成學禮和德情克昌厥後
蘭枝鬱森四高樓日暮寒沍雲陰不聞烏曉明月乍沈
五母儀令善千載猶生銘之金石用垂頌聲六

又

錢大昕嘉定

郊居岑蔚竹柏交秋霜轢物羣英彫小樓一燈青不搖
課兒夜誦聲呶咬柳邨嶽嶽古英豪山邱華屋如驚泡
淑姬寤言矢終宵手持刀尺敢憚勞離鸞別鵠哀弦操
可憐荻影風蕭蕭熊丸茹苦勝珍肴湛侃復見良足褒
竚看

紫誥慶所遭烏頭綽楔榮光高何圖蕙艸謝一朝樓存

人去魂難招郎君玉立森蘭若春暉未報心怱怱音徽
追溯倩畫描披圖展拜恆號咷我爲歌詠輝風騷

又

袁鑑錢唐

吾家節母系南陽淑德來嬪地道光屈志不嫌周絡秀
貞操直媿衛共姜誓輕墜玉甘同穴義重遺珠痛未亾
息影深閨勤撫字灰槁木作心腸

竹淚汎瀾賦柏舟傷情風雨守空樓行高巾幗萬千輩
操凜冰霜十五秋龜勉及看見授室逡巡還卻壽添籌
堂堂偉節堪維世最是無心戀白頭

截髮磨笄事已陳汝南懿德有誰倫雄才哲嗣階前玉

勁節

崇褒日下綸素絹追摹憑女史貞珉載筆屬名人披圖
讀傳欽餘烈遺挂猶嫌寫未真

慈雲黯淡月光微柏護層樓竹映扉拭淚丸熊情彷彿
挑燈畫荻影依稀招魂莫挽青鸞駕展像難忘縞紵衣
一代芳徽標史冊絕勝反哺報春暉

又

李繩長洲

彈別鵠單棲宿寒蠶弔月唬空閨絡緯宵機催斷續竹
筠柏幹操比堅冰藥心苦若爲傳慈烏哺雛雛成羽坐
臥小樓十五年

又

陸桂森長洲

袁母韓太孺人柳邨袁公之淑配也柔順而貞
溫恭且惠早歲克嫺禮度姆教無違居平素習
衿莊璇閨待字維時柳村袁公芝蘭毓秀雖誇
洛浦之珠而棣萼終虛未溥螽斯之慶爰聞女
嬃之賢遂納遠氏之箴焉於是乎修壺職以輔
中饋操井臼以佐蘋蘩亦旣婦道克全無慚闡
教矣迨一旦彈別鵠歎離鸞孤子尚在髫齡幼
女未離襁褓此其情何以自堪哉孺人則深閨
哽咽至死靡它坐臥危樓自甘荼苦歷一十有

五年而駿鸞長逝焉巾幗有完人若是是何可
湮沒而不彰哉迄今攷其事披其圖黛柏蒼蒼
修竹青青冰霜之氣凜凜如生因爲之作歌以
記曰

古幹蕭森兮干霄映日遠岫嵯峩兮窗中羅列守貞志
潔兮懷玉壺冰撫孤念切兮泣掌中血艱難永矢柏舟
節倚樓一望化爲石階前玉樹自亭亭朝兢秀兮夕敷
榮潛德幽光詎終閔彤管他年姓氏馨

又

翠柏味恆苦修篁影亦癯各挺歲寒操宜與節母俱高

沙維杓 吳縣

樓絕游氛環植蔭四隅蕭蕭朔風厲淡淡陽景晡劬勞
十五載惟撫剝下雛丸熊佐夜讀截髮供中廚弱冠甫
授室春酒正盈壺人事一朝變芳徽遽云徂扇枕念徒
切褰帷夢難趨祇將平生恨揮淚成斯圖殘雪壓枝重
凍雲罨檐鋪寒林氣淒緊髣髴聞慈烏

又

張岡 吳縣

蒼蒼松柏竹真乃歲寒姿太君倚樓坐正值雪霽時高
節森自立清風况兼之且幸蘭與蕙秀發當階墀竚望
鸞書來表揚後世知

又

陳景元 元和

涼意生小樓竹柏影蕭瑟曜靈薄崦嵫光景忽已夕素
魄猶未升明星爛然出寒蜚嗥我前蟋蟀鳴我側一十
五年中延佇空太息女貞風蕭蕭寸心長惻惻

又

金會源 吳縣

閶闔雲深地春暉何處尋樓臺侵曉月竹柏見貞心中
有凌霜操曾傳別鵠吟庭陰空積翠日落聽孤禽

又

王鳴韶 嘉定

西北有高樓竹柏得其真高寒邀夜月瑣碎臨清晨瘦
影鬱奇姿正對樓窗櫺櫺櫺妙婉嬾中有苦節人雲霞
爛于錦那照冰霜筠柯幹作銅鐵歲寒德爲鄰任他世

綺豔此獨無回春竹雛茁繡箨柏子香自珍棲託恆在
斯守志終嶙峋嫵媚舒鳳影虬蟠醮龍鱗長齋繡我佛
自成不壞身披來圖書間彷彿若有神遷化雖已杳志
節嘗如新自有漢中壘傳之繫以論袁氏六俊門卓哉
誰與倫

又

沈英 震澤

翠柏抱貞心修竹挺高節異稟超凡類推爲後彫質卓
哉韓孺人秉性一何烈當年稱未亾熒熒守一室之歿
矢靡它撫孤情逾切苦志十五年空閨歡笑絕綺羅不
爲御膏沐不用櫛心似灰冷志竝秋霜潔訓子禮法

嚴溫溫進儒術操行能如此不愧古賢哲披圖神肅穆
猶見心如結清節自古難至性不可滅定教厥後昌
鸞誥光泉穴并得垂青史千秋長不沒

又

潘奕雋 吳縣

層樓岌業凌蒼旻有竹有柏搖清風溯昔母稱未亾人
夏日冬夜長冥冥晨起晝荻暮丸熊茹荼撫茲藐孤嬰
足不履地維樓登今也成立貽令名方薛氏鳳荀氏龍
板輿間居樂融融令妻壽母古所稱一朝霜飛摧女貞
塵寰難竚泡露身珠幢玉節騰童童有樓突兀櫟晴空
反哺何日心怛怛猗潛德萬口同賡竚看綽楔

旌門榮與桓泉鍾光同爭繫柏比堅竹比清更千億祀
常蔥青

又

林蕃鍾 吳縣

雨雪知歲寒大化迴洪鈞衆卉徒紛靡竹柏自有真物
候遞轉移泊焉甘沈淪高樓照明月聊復寄此身素履
獨行願冰蘖含苦辛之歿矢靡它義命乃克循女宗良
不愧卓哉何超倫畫圖足景仰詎敢披拂頻清操標古
幹殘淚盈湘筠迷離辨寒影勁氣通蒼旻持此堪作鑑
寧獨傳貞珉垂之千百禩賢軌知所遵

又

方薰 石門

猗與母兮德貞志淑佐治潔齊秉禮迺肅吁嗟數屯所
天不祿不我撫孤生匪我欲聞惟斯樓閉此勞獨仰天
而悲慘其黃鵠縲軒斯勤荻教斯篤令子克成厥修如
玉一十五稔荼苦良足之歎靡它可瞑吾目淒彼清飈
來自柏竹臯魚有淚溼此萊服遺挂宛如巋然樓桷是
竹是柏皆爲風木念茲在茲寤寐往復孰爲餘身不念
鞠育天之報施洵無不穀母賢子孝懿熾可錄

又

顧 鈺 無錫

此竹柏樓居圖吾友袁君不忘其親節母韓太
孺人之所爲作也惟母秉姿淑慎矢志堅貞見

於碩公鉅卿之紀述者至詳且備年二十五而
寡寡十五年而繼殞得以見子成立報所天於
地下亦可含笑九泉矣竹有筠柏有心其於比
似母節也宜而吾獨以袁君之不忘其親益見
母氏之教之賢也因識其末復系以詩

彤管垂芳範從容義獨優從夫素志切翼子此身畱喜
見鳳雛長言陪鶴駕游貞操何處仰百尺最高樓
非擬懷清築蕭然坐一林竹森環戶翠柏古落庭陰畫
荻慈親志登樓孝子心當年紡績處傾聽有遺音

又

張廷桂 嘉興

節堅湘筠竹心貞歲寒柏竹柏有本性堅貞女金石樓
中守志人操比冰霜白茶蘂備苦辛蒼幹標清格華胄
系南陽筵室雪門客雛鳳吹簾和離鸞中道隔靡它心
乃矢撫孤節斯植柳氏熊佐九歐家荻指畫息影守空
樓傷心風雨夕四旬設幌辰屏卻稱觴席含貞十五年
一旦月沈魄人去樓寂寂庭翠畱空碧柏舟虛泛流竹
淚猶涓滴孝子思永言乞

恩揚令德家乘志清芬彤史昭垂式慈顏慕不忘繪圖
傳遺迹展卷淚盈盈哀歌情惻惻感動名公卿表題成
累百愧我句荒蕪里詞徒塞責千載共悠悠不朽貞銘

刻

又

蔣業晉 長洲

籊籊竹竿清而癯沉沉柏影翠欲鋪寒林日暮反哺烏
高樓有母思其居樓居昔日撫孤雛襁衣蒿簪常向隅
紡織課讀供中廚十五載歷忘勤劬令子成名湛侃如
四十稱觴爲母娛母言忍死爲汝孤吾豈貪生義從夫
卻壽未幾忽告徂哀哀志節達

帝都一朝綽楔旌門閭觀者大悅充路衢鉅公椽筆珍
璠璣名流題贈比生芻畫荻九熊封鮓魚古來賢母齊
名譽孝子追念慈幃趨音容宛在樓成圖湘妃竹淚化

非誣其姜柏舟矢自殊魂之來兮乘素車魂之返兮房
櫳虛霜風淒緊木葉疎離鸞中夜聞哀呼有筠有心盡
範模生雛結子報區區孺慕豈忍忘須臾六俊慈孝傳
中吳此樓此景他家無

又

張鳳翼 元和

竹有筠兮柏有心層樓峙兮竹柏林中有人兮穆衣而
蒿簪撫孤兒兮歲月侵兒成名兮齊侃湛壯有室兮母
沾襟欲報地下兮慰同衾霞觴在御兮不樂斟矢志相
從兮發苦音頓爾驂鸞兮杳莫尋石齒齒兮水泔泔朔
風淒兮繁霜淋柏參天兮竹森森樓空月落兮白雲深

又

朱黼 常州

化石遺容永不刊

恩綸褒錫沒身安若為杵臼捐軀易得育歐陽筮室難
將進酒教雙淚落未亾人已一生完 事載節母傳 心傷十五
年中事竹柏樓高仰止看

又

李保泰 寶山

寡鵠有哀弦萱草無晚榮志事一以畢存順沒亦寧大
節畱巾幗彤管揚其馨歸如魯靈光陋彼秦懷清至今
高樓上風雨護幽冥
令甲三十年畫一如合符節行苟不羣成例焉足拘貞

操激薄俗百歲只須臾移之作男子寄命與託孤回語
事人者典型視茲圖

又

汪縉 吳縣

柏有子竹有孫摹懿範節孝門門以內苦節貞柏霜空
竹風清有樓居竹柏邊竹拂地柏參天樓翼翼臨淞泉
孝思永竹柏連誰能畫老蘭如傳百世頌樓居樓居頌
節孝吟竹有筠柏有心竹箇箇柏沈沈淞泉鳴咽幽林
咽幽林無古今

又

沈本陞 舒城

竹柏樓高溯母儀披圖如讀柏舟詩從知清節堅冰雪

十五年來獨倚時

白鶴離羣老尚單殉夫豈憚少時難剗前爲有遺孤在
不到成人灰不安

龍章遙挂綵樓前海宇羣推巾幗賢從此小星光彩大
皎如皓月照中天

又

方如川 歙縣

嫋嫋修篁裏頻年獨倚樓慈雲垂半畝高節凜千秋夜
雨瀟瀟黯寒煙靄靄浮女貞光竹帛青簡孰同儔
母也嗟天只高樓乃獨居堅心傲霜雪黛色繞蓬廬
與舟同汎須知室自虛寒鳥號柏府中壘有藏書

又

奉匱六載喪所天撫孤矢志何其賢操與相同勁節比
竹更堅竹還棲鳳柏永年樓居一旦歸重泉重泉含笑
見夫子爲道藐孤成立矣藐孤成立夫子喜乃知獨活
良有以寡鵠歌來尚負慚懷清臺好何堪擬億千年後
死如生十五年中生亦死

又

王金英 江寧

吳下有高樓巍然竹柏間竹節青且勁柏榦翠而寒居
此者爲誰袁門母姓韓委身於大夫鄉閭稱淑賢盡禮
事其嫡自安分宐然朝夕佐家政辛勤每力肩詎知命

不由一旦失所天鳳雛纔六齡教育心乾乾終日巢樓
上不覺十五年一朝羽翼成風格何翩翩吹簫引鸞侶
雙祝畫堂前此時母應歡此時母轉歎我志旣以愜我
身寧獨完倏然從地下宛若見有先大吏憫其賢特奏
旌表焉按例殊破格眞誠感乃專祇今行路人咨嗟望
雲煙雲煙何裊裊樓前綽楔懸史氏比周陶佳名千古
傳披圖深仰止爲賦樓居篇

又

陸應宿 錢塘

懷清閨範久稱賢竹柏樓居十五年茹蘗志非忘一死
撫孤事可告重泉預知數盡稱觴夕難挽魂歸兜率天

願得此圖描萬本薰香供處當金鑄

令子能彰節母名天閭遙看婺星明公卿贈徧珠璣字
恩命頒來綽楔榮反哺自多風木恨登樓還憶課書聲
蓼莪我亦悲吟客祇覺無成愧所生

又

鄭 珪 懷寧

風雨滿空樓青燈夜夜愁死生如一日竹柏共千秋余
亦幽貞後臨文涕泗流 先大母歸歲餘而孀苦節四十餘年已蒙旌典 何當

求素手長跪繪松楸

又

孫士毅 仁和

竹柏繞危樓淒風十五秋青鸞方獻壽黃鵠迴含愁教

子名先就從夫志果售芳徽傳煒管綽楔炳烏頭

又

袁 樹 錢唐

乾隆庚戌秋仲廷禱屬寫竹柏樓居圖美盛德
之形容摹風徽於想像一本之誼也未敢以不

工辭既勉事成幅爰賦短律二章竝錄於左

忍盡嫺媮淚高樓十五年冰霜同皎潔竹柏共貞堅生
死皆知命

恩榮竟自天撫孤遺澤遠早卜後昆賢

吾宗竹谿渡清節有家風派遠流雖異花繁本自同聲
容傳卷裏壺德振門中截髮圖賢母深慚筆未工

又

錢大昕 嘉定

竹柏樓詩為袁節母韓太孺人作也節母之子
廷禱屬香亭太守寫竹柏樓居圖卷裝成以示
大昕爰作五言古詩紀之

冉冉孤生竹磊磊歲寒柏小樓當其間清陰照几席中
有高義女盛年守絜白十三能誦詩十五工織帛十九
相夫子家事佐繁劇洗手奉羹湯和灰澣襦禪事嫡如
事姑相得心莫逆一朝喪所天挽髮捺笄尺坐臥只此
樓誓與人世隔有兒纔六齡生未識阡陌有女襁抱中
學語但啞啞顧復更攜持拮据手皸折兒病母矜憐兒

慧母護惜衣綫皆親縫荻葦常自畫伶仃一老嫗衰髮
垂半額相將蛩蟹依誰與話肝鬲有衣但麤疏有食但
糠覈膏沐屏勿施簪珥久已釋寒風吼檐牙凍雪入窗
隙不知桃李華那識春秋易惟將淚洗面長此痛在噓
竹柏倘有知或能鑑疇昔荏苒十五年冬綿換夏綌兒
長室已授女大對亦擇慈母設帨辰張樂將會客母曰
亟止止戲綵吾弗懌古稱未亾人豈宜絢金碧撫孤幸
有成行將返大宅其秋果示疾屬纊去來適乃知冰檠
心已證人天籍哀哀純孝子涕泣念手澤貌成竹柏樓
音容永無斲所傷左女亾撫卷增標擗

廷禱同懷妹素
英年廿一未及

嫁而卒於室廷禱屬我紀以文彤管示規護我讀劉向
每言及之輒淚下傳淑懿異標格又觀武梁祠高行勒貞石絡秀昌周宗
宣文著秦策敬陳竹柏篇以續詩三百

又

梅 冲 宣城

小樓百尺樹四圍披圖滿耳長風悲竹柏峭蔭交柯枝
霜寒月冷流貞姿袁君涕泣前致詞我生孤苦成於斯
我母居此十五期四十不慶竟永辭此中苦盡無樂時
我思節母殫艱危十五寒暑如駒馳當其強生撫岐嶷
何嘗須臾忘所依起坐高樓清月輝霜筠黛葉垂參差
中有逸韻流淒其哀鸞別鵠爲堦篋青燈一點昏素帷

和熊午夜心孜孜窗間隻燕將雛飛時屢改兮心不移
回看兩鬢皆成絲有子有婦雙奉卮從茲正可安耆頤
松根生蘭蘭生芝歷苦得甘重受釐胡爲稱祝歿繼之
未亾人外無所知謂與大夫已久離所以不歿爲此兒
旣冠旣婚心事夷遂我初志何所羈是知苦操雖久支
暗中冥路原不違嗒然欲歸竟長歸吁嗟柏舟傳衛詩
筵室苦節古更稀清芬廣被江之湄人有歿時名不衰
樓在亾人亾何怨咨此樓乃與人俱垂
天章焜耀輝丹墀名公鉅製聯珠璣我欲咏歌手莫追
傍徨執卷思芳徽

又

認得青山是望夫繞樓竹柏萬千株身如缺月懸三峽
心似春潮落五湖到曉機聲寒不斷課兒燈影夜同孤
幽懷那盡傳毫素曾有清名付董狐

勞崇輝

懷寧

又

節烈推賢母樓居十五年持身勤且儉守己正無偏艱
苦俱嘗矣追思尚憮然傷心摧玉樹矢志託冰弦旅雁
情同冷蒼松性本堅全家支健婦勉力報重泉困積仁
人粟莊增負郭田折蓼施姆訓剪髮把賓延明月花開
夜深秋葉落天和九時戚戚畫荻意懸懸燈影寒窗永

陶渙悅

江寧

書聲繡閣連果看雛養就早學鳳騰舉稍慰共姜志能
揮祖逖鞭恰逢稱慶日剛值暮春前不羨雲璈曲翻吟
黃鵠篇傷哉親忽逝幸矣子能賢圖畫音容在韶華瞬
息遷柏經霜更翠竹耐雨尤鮮暝目胷無憾撫孤事已
全堅貞誰得似辛苦眾爭憐賤子棲江左蕪詞寄素箋
望風懷悵悒握筆意勤拳哀誄公卿錫芳徽史冊編
恩綸高綽楔千古姓名傳

又

潘瑛

高樓寒月照孤眠竹柏同心十五年課子燈昏風雨夜
望夫魂斷別離天吳中士女空追貌邾下歐陽自表阡

諸葛廟前湘水上一般幽恨古今憐

又

顧敏恆

無錫

孤鸞不惜死春此掌中雛蘭室餘生在泉臺慰意無飛
蓬容鬢改逝水歲華徂巾幗推完節何曾愧士夫
迹謝人間世珠塵鑠翠樓貞心偕竹柏斷夢倚松楸半
灰身如寄同歸命不猶年年傷別淚省向九原流
底事稱多壽彌令感未亾同禡存歿異殘炮影形傷燕
絮三春月烏曉五夜霜拊棺翻得所休覓返魂香
音容嗟已隔梧捲慕何深此日孤兒夢千秋阿母心畫
圖空染血碑字欲生金繞徧樓前樹哀哀返哺禽

又

蔡曾源

四川

樓頭缺月寫幽蘭十五年來弔影單苦志孤雛燈下課
傷心別鵠夢中彈竹因勁節摩霄漢柏有貞操耐歲寒
令子能彰賢母德瀧岡表煥

詔書丹

又

印鴻經

寶山

夢斷重泉血淚枯未亾端為藐諸孤管彤縱有陽秋筆
一片冰心貌得無

綽楔榮衰

御榜懸何須設說更開筵樓頭竹柏蒼蒼色閱盡冰霜

十五年

又

潘庭筠 仁和

高竝貞松翠接天蒼斑黛色小樓前梯枕獨上三千尺
霜雪曾經十五年賴是叢香生孝筍爭禁幹化咽悲泉
試拈史筆書彤史粉墨應同綽楔傳

又

月地休疑苕藻橫要看霜勁與風清畫時遙向高樓拜
慈竹陰中翠實生

復效籀石先生作數筆爲節母狀其清標貞性也幸
毋以蛇足見誚筠又識

又

尹壯圖 蒙自

小樓獨弔影雁涼十五年來號未亾竹挺貞操搖澹月
柏檟孤幹傲嚴霜九因和就衷彌苦荻到畫成字有香
可惜春暉促絡秀寸心未報伯仁觴

又

邵晉涵 餘姚

繞庭竹柏間青蒼夜影休猜苕藻涼百八十迴飛破鏡
寒波祇照一樓霜
未亾人守禮經遺正日親裁卻壽詞憮念我辰悲覽度
靈均騷賦小弁詩
絡緯聲中玉漏沈愁端千縷繞殘鍼卽看才子臨風錦

想見當年授紡心

又

程瑤田 歙縣

孝子不忘親自瞿感見似焉所存其真無形安能視所以寫遺容更欲傳芳軌巍巍百尺樓端居矢之歿苦心與勁節視此竹柏耳雖復十五年而已足千禩

又

徐嵩 金匱

韓氏女十九嫁二十五年作母寡長城崩摧眼血瀉非生非歿十五年誓不下樓抱兒眠樓外竹柏高參天兒有室家母心苦纔下高樓入黃土

又

王汝翰 上元

節烈有至性忠貞無二理我聞漢管寧清操咸仰止樓居終其生高風著青史卓哉韓孺人苦節繼前軌悒悒十五載高樓長獨倚樓前竹與柏森森互排比想見嚴寒時蕭蕭朔風起爾時樓居人揮淚不能已所天旣已亾妾豈不能歿柰此藐孤何熒熒一稚子含涕訴悲辛灑向松筠底松影何清癯竹味豈甘旨持此堅白心勁節差堪擬冉冉秋復春不覺歲月駛喜見鄰下人亭亭成立矣授室一以畢慈雲忽焉圯志節達帝都綽楔光閭里更得名公卿各贈詩銘誄而我亦攜辭浮毫寫生紙會見賢母風千秋猶興起

又

李 棨 長洲

苦節歸巾幘清徽屬女箴自揮湘水淚不改歲寒心白
首冰淵潔青山霜雪深庭階留厚蔭依被在樓陰
靜識空中景清辭世外緣花寒香露淨秋老淡雲偏刀
尺孤燈畔機絲夜月邊更資畫荻教遺訓仰前賢

又

程世萱 元和

大節高千古樓居十五年撫孤吾志畢可以告黃泉
冰霜出天性竹柏差可擬繪圖誌孝思是母有是子

霜哺遺音卷四

隨題隨梓不敘爵齒

詩

竹柏樓居行

并序

王鳴盛

嘉定

袁老親母韓太孺人苦節撫孤事蹟已詳予所
撰傳及袁簡齋太史墓志中可毋庸複述令子
廷禱哀慕無已乞女士陸修梅寫真金子徵補
樓居圖又乞方蘭士寫第二圖皆但有像而已
尚未顯繪撫孤情狀去秋復乞袁香亭太守寫
第三圖孺人坐小樓中子女皆在側親加訓課
樓外環以竹柏然後情狀宛現目前諸君子所

題署各體咸備矣予爲作長短句樂府一篇命
曰竹柏樓居行以紀之

攢枝竹鬱鬱青側葉柏勁且貞嚴飈吹密雪零四時柯
葉終不改歲寒挺特交崢嶸韓姑淑女幼擅令譽能辨
凡將能理機杼佐室汝南徽範著吁嗟乎胡爲薤露易
晞不待暮丁令威白鶴歸青陵臺一夕摧絙瑟彈我別
鶴操弦急柱促聲何哀上顧滄浪天下視黃口兒大者
男六齡小者女嬰媿摘菜持作羹斧冰持作糜羹糜一
時熟男號女泣方纍纍十指挑絲手與口子子粲粲晨
及西竹產石罅總不茂柏無雙幹但孤秀曾聞僊人好

樓居節母上樓不復樓下趨布鬢箭筈髮伶俜兩鬢垂
鬢影明鏡無光膏沐斷惟有竹聲柏影清交加春來兮
秋去秋霜兮春露春花正濃竹自淡秋葉全凋柏自古
流光屈指一十五之處靡他母最苦兒長有室兼有子
讀書砥行不求仕七略三倉嗜窺覽啟口洮洮足文史
母年四十設帨期肆筵舞綵宜此時母色慘瘁乃力辭
爲言辛勤鞠子幸成就地下將從夫所之轉眼兩月一
笑逝虛空撒手如前知令子痛自搏搶地雙淚落回想
廿載樓居事如昨不幸弱妹未嫁復奄忽兒獨生兮生
何樂終天抱恨不可償徧乞好手追仿摹容光一圖二

圖三圖繼務求當年景物一一呈豪苾良二千石六法
良筆精墨妙難意量遠追漢代鑄武梁不數中壘力闡
揚茲圖既成節愈顯牙籤玉躡金題裝圖中髣髴人未
亾妻妻繆幕曳素裳熊丸親課含悲愴竹聲浙浙儼成
行柏影落落遮樓窗嗚呼此竹多節似母節碧色琅玕
永不滅此柏與母節並堅流芳彤管緜千年世間豈無
瑤林錦樹森百尺若較此竹此柏玉比石

題竹柏樓居圖

錢維喬 武進

禮載祔女君記云不夜哭所天義無殊後死貴自勗昔
人垂婦式其難在嫠獨育閱當百辛往往仰天祝矧乃

同穴期大化有遲速孰能酬夙願不爽眇應胸岑樓倚
秋空環植柏與竹誰歟繪此景永慕出莪蓼母節視寒
筠母心比堅木撫孤迨成立歲月亦轉燭力却堂前觴
竟化地下鵠沒寧由素志造物殉所欲惟餘畫荻居長
愴望雲目披圖森翠藹髣髴鳥啼屋想見鳴機人蒿簪
一燈綠四方馳琬琰孝思猶未足持此勒貞珉以當女
史續

又

莊宇達 武進

青青之柏挺節於霜森森之竹結淚於湘靈植高潔誰
其頡頏此間有樓樓中有鳳自失厥偶哀鳴徬徨欲殉

以身有雛可將花無春敷水不波揚一十五年母不下
堂迨兒有成蔚爲圭璋義璘若馳四旬稱觴對酒不懌
母心則傷我未亾人何壽之慶後死事畢如逋而償下
報九原視歸故鄉祈死卽死誠通彼蒼竹兮柏兮鑑茲
貞芳冊載住世千秋有坊圖懸日月爲彤管光敢告女
史銘之勿忘

又

周光鹞 仁和

竹柏蕭蕭認舊踪小樓岑寂幾秋風籌添海屋人初度
星落雲衢發乍空苦節有年勤恤緯義方無日懈丸熊
卽今高行留彤管

鳳誥連翩正未窮

又

李兆洛 武進

臺以懷清築堂因畫荻名況教周絡秀上媿魯陶嬰竹
柏留高節冰霜驗晚榮琳瑯徵詠遍林下緬幽貞

又

桑庭樵 錢唐

高臺曾說號懷清又見樓傳竹柏名槭槭簾前無乳燕
森森樹底鮮流鶯凌寒不厭冰霜苦耐久常完天地貞
已荷

旌門榮綽楔披圖更共仰崢嶸

題薌亭二兄爲袁節母韓太孺人竹柏樓居圖時

王子正月上澣
朱家濂 仁和

登樓顧影思千結
吾友筆簪摹高節
猗與慈孝鍾閨庭
母也獨負凌雲潔
竹柏幽居十五秋
貞秀端爲霜下傑
神妙寫出冰蘂心
展圖續詠揚芳烈

題竹柏樓居圖

孫志祖 仁和

樓居仙子絕纖塵
勁節堅心十五春
竹柏環牕青不斷
濃陰天護未亾人

孤鸞雛燕共相於
清蔭高遮半畝餘
風雨寒宵人罷織
挑燈猶自課兒書

又

梁履繩 錢唐

苦節高於百尺樓
樓前竹柏幾經秋
劇憐樹靜風還動
共看圖成澤尚留
令式新題安綽楔
慈闈遺教自箕裘
傳家聞說藏書富
世積聲華左契收

又

梁玉繩 錢唐

森然萬木中
竹柏爲最壽
人苟如竹柏
可以名不朽
竹有時而隕
柏有時而枯
人果真不朽
竹柏亦不如
人空樓亦空
愴然圖畫在
孝子淚盈把
竹柏爲之萎
植柏柏有子
種竹竹有孫
慈蔭傳奕禩
足慰貞節魂

慈烏行

段玉裁 金壇

爲袁節母韓孺人作也
孺人歸於奉直大夫袁

君森如爲側室廿五而寡守志不下樓者十五年撫所生廷禱見頭角有室矣於設悅之辰奏樂稱壽母曰未亾人安用是爲吾將從爾父於地下矣遂示疾而終廷禱繪竹柏樓居圖廣徵詩文顯揚親善哀然成集云

老竹籠煙千萬枝古柏參天二千尺拏雲嘯雨幾多愁
中有啼鳥啼不息問鳥何所思問鳥何所憶鳥不能言
對以臆吁嗟反哺哺不得有母盛年喪比翼單棲夜夜
依竹柏寡鵠孤鸞哀怨聲月明風裊蒼堅色辛苦將雛
十五年孤雛一旦成六翮爾子居然有室家爾母悽然

神不憚此巢堅卧憶同袍此心不轉傷匪石空教天女
散花來一病奄奄遂示宗吁嗟乎慈鳥一去不可留竹
柏依然遶舊宅三帟難尋鞠我枝一抔空薦寒泉碧恤
功愛室感當年母瘦兒肥痛疇昔徧請迦陵窈眇音爲
歌鬻子恩勤力卽今竹柏尙扶疏孤雛守護長無斃我
聞此語最傷心將母情懷共悽惻慈鳥孝鳥有如此遂
令百鳥皆欽式竹死柏枯會有時慈孝千秋無終極

題竹柏樓居圖

鮑廷博 歙縣

竹柏樓節母居節母誰韓家姝十九筵於袁大夫大夫
死遺六歲孤撫孤成立母告殂十有五年竹柏如竹青

青柏蒼蒼此樓翼翼泮水旁柏蒼蒼竹青青畫圖百代
垂儀型君不見吳中袁母自昔傳翁公大書霜哺篇竹
柏樓相後先

又

范來宗 吳縣

泥落空梁息影深哀鴻叫斷暮天砧綺羅香溢東塘路
誰識樓居夜夜心

勁節相於十五秋歲寒不畏雪霜稠西飛青鳥歸何速
留得清陰繞畫樓

能事推袁古不殊春暉欲報淚痕枯漢陽孝子應同痛
寢室曾傳奉饌圖

漢陽閔孝子貞痛親不逮養嘗於寢室恍有所遇自寫奉饌圖

又

左輔 陽湖

竹箭自有筠松柏自有心衆芳萎時晦安知雨雪深森
森歲寒姿不改青春陰綠陰正當樓中有寡鶴吟吟聲
徹九天風瀟月黯沈上感蘭巖鶴下撫沃野禽苞采生
文章和鳴中瑟琴伊子申雅契廿載登堂欽聞風起慕
思披圖肅整襟管彤百世師來者其視今

又

金學潮 吳縣

有樓翼然竹柏稠霜侵雪壓寒塘幽袁家有母矢貞節
至今人去樓長留昔者阿母居斯樓飛花落葉十五秋
夫捐館時兒尙幼兒今成名紆母憂四十爲壽母轉愁

吾不爲爾吾何求人稱未亾安可壽翩然辭世歸山邱
母之生兮水中漚母之身兮波上鷗母之心兮柏之直
母之節兮竹之修竹爲楫兮柏爲舟在彼中河沉更浮
礪石磊磊剛不缺井水渌渌止不流卓哉母節誰與儔
卓哉母節無與儔

又

許兆桂 雲臺

聖朝樹風聲宅表忠孝節孝護慈竹陰忠耿歲寒柏二
者實兼之婦節誓同穴以斯成至孝撫孤矢冰蘖事夫
如事君未亾心飲血大吏奏 明光
天子俞綽楔高樓何峩峩竹柏團霜雪圖詠人共欽令

母意豈屑獨見孺慕心於茲孝思結移孝還作忠九京
親迺悅庶幾十五年茹苦志始揭休哉忠孝節石爛名
不滅

又

許兆椿 雲臺

廿載冰心五夜霜養成雛鳳上天閭懷清臺上清風遠
可及樓前竹柏香

又

陳奉茲 德化

客與袁子來 王西 倒屣生愛畏恂愉孝子色華博學人
氣長卷三百尺文辭所交彙老蒼盡知君落筆無或未
持以表賢母竹柏日森蔚高樓地道安側室禮宗貴深

知始終事自示死生慰十五年中
心令名曷有既

又

王昶 青浦

竹柏樓香溪濱柏如鐵竹如雲表
貞節颺清芬禮宗賢
母古所敦繪以縑素清而醇采
鞠樹護能思親束身圭
璧終無諛留題翰墨盈儒紳吳
中薄俗工笑顰勵世可
以端彝倫試仰縞衣兼綦巾

又

法式善 蒙古

秋風起天末涼意動柏竹石葉
綠一庭瓦燈紅半屋山
吐婉孌雲窗掩嶙峋木幽人樓
中居霜雪慰熒獨悽悽
十五年春雨忽如沐謝彼烏啼
林睽茲鶯出谷曉日炫

溪花清芬播層麓

又

王宸 太倉

有客捧卷來徵詩披圖流覽貞節
辭吾鄉若此炳耀事
我詩不工合記之森森千個竹血
痕常帶湘妃哭凜凜
五株柏誓成可繼共姜格竹兮柏
兮護斯樓中有人兮
心隱憂春鷓秋蟀十五年我心匪
石比石堅教兒讀父
書燈下勤紡績書聲和紡聲夜坐
四楹寂熊丸母教兒
大成授以室家光門閤母年四十
兒稱觥母曰今夕非
吾生未亾夙願今已傾流光逝矣
迎三彭
天子知之

錫褒旌孝思不愧垂令名吁嗟乎韓孺人飲冰茹蘗心
非苦下視黃泉如樂土心迹貞於竹柏操不爭一息爭
千古

又

張九鉞 湘潭

竹柏之樓渺何許東望支硎峯寧空烟雨我聞袁家節
母此樓居足不下梯年十五蘆簾繆幕深深垂孤雛在
襁慈烏哺兒已成立有室家慷慨從夫歸后士臯魚慘
泣想音容欲借丹青將恨補詞人女史彙爲圖調鉛殺
粉皆妻楚已著蒿簪練服徽誰描茹蘗餐荼苦朱君攜
示城西齋 澗東來湘潭晨興洮手襍褫開湘江六月糝

冰雪突兀疑築懷清臺不知此樓環溪面嶂翠幾疊惟
見虬拏鳳舞中有清飈撼撼從之來當年卷軸刀尺與
機杼白雲靜掃無纖埃瑤妃紅淚欲重滴鼓瑟定奏離
鸞哀我未識袁君展圖感孝思芳聲懿嫩播藝林珠玉
堆仍錦文織

旌廬綽楔龍躩踞此樓亦與撐天地欲觀端州太守第

三圖樓中訓課子女趨別有竹香柏影交扶疎 同年袁香亭太

守作第三圖西莊光祿題長短句樂府

又

朱成 吳縣

竹有節柏有心樓中有母淚滿襟樓前落花一尺深柏

有心竹有節樓中有母腸斷絕樓前杜鵑夜啼血樓中
十五年教兒甫成立娶婦宜室家四十流年急兒爲母
稱觴母胡爲絕粒謂兒我是未亡人大事已畢寧逡巡
撒手泉下偕夫君兒心悲哭不已畫遺容似不似空樓
高人去矣至今樓前竹柏愈青蒼

龍章綽楔森輝光懷清高臺屹相望袁君與我爲執友
登堂未拜茅容母坐我樓下展茲圖刀尺紅車猶在否
吁嗟乎音容不見見冰心滿卷虬枝鳳篠交森森

又

洪亮吉 陽湖

竹柏之圖伊誰所畫我亦鮮民淚隨言下云是今孝子

築樓表其親母爲曹大家兒亦袁愍孫開窗東崦西崦
繞屋南谿北谿佳哉是母是子乃爾朝斯夕斯樓前山
色青無已樓下水波清見底課兒讀書窗甫啟我欲上
樓先頂禮

又

鐵 保 滿洲

吳中有女士秉性淑且賢爲筵於巨室六載喪所天妾
生二十五年矣此身惟欠一死耳顧念幼子啼呱呱椎
心泣血強爲起強爲起撫厥子子成立節婦死我聞婦
居竹柏樓竹也柏也真其儔更聞四十婦初度力却稱
觴矢衷素凜然大義死靡他十有五年宛如故吁嗟乎

黃鵠歌烈女吟我懷往昔如在目今吳山峩峩水鳴咽
霜烏夜啼霜天月

又

沈初 平湖

蓉塘嗚咽水聲悠雪白霜清十五秋不是詩人傳孝子
那知西北有高樓

才名洛下總推袁通德由來著孝門 柳子厚有孝門銘 竹自生

孫柏生子春風難補北堂萱

母教當年得最優東坡識字肯低頭遺書直比籛金富

五硯樓成勝鄴侯 孝子家有五硯樓藏書甚多

我亦愀然憶少時閨中慈訓似嚴師湖邊老屋今何處

苦節真同萬古垂

又

孫仁淵 仁和

竹有筠兮孤生柏有心兮暮榮倦茲樓之百尺兮對竹
柏而雙清維斯人之亮節兮共竹柏而同貞夫既死而
子幼兮我何爲而捐軀茹荼苦以塊處兮獨顧復之勤
劬子既立而夫死兮我何爲而久居屏壺觴而弗御兮
誓將死以從夫心如竹兮暑不入身如柏兮凍不折與
茲樓以終古兮撫竹柏兮腸斷絕

又

吳貽詠 桐城

匣中破鏡掌中珠死不嫌遲爲立孤江上縞綦終化日

樓頭霜月舊啼烏
几筵秩秩身如燭
竹柏蕭蕭影在圖
十五年前紅縷燕
重來應見鳳將雛

又

徐文壇

嫁得梁鴻六七年
憑高一望總茫然
相期偕老宜家處
早是傷春夢雨天
野鶴不歸應有怨
玉釵重合兩無緣
陰移竹柏濃還淡
明月東風叫杜鵑

白居易

劉禹錫

權德輿

韋莊

素手亭亭對夕陽
知傳家學與青箱
堦前駿馬追騏驥
竹下鷓鴣繞鳳皇
萬卷縹緗閑富貴
一樓風月夜淒涼
韓憑舞羽身猶在
袁氏芝蘭閫外香

李嘉祐

劉禹錫

楊巨源

韋莊

事夫誓擬同生死
蝸舍沉冥十五春
年長每勞推甲子
夜寒誰共守庚申
鐵心自擬山中賦
白骨甘爲泉下塵
明月斷魂清靄靄
舉家相對却沾巾

張籍

白居易

前人

許渾

此生何處拜儀型
曲几焚香對石屏
德望舊懸霄漢外
門風常有蕙蘭馨
謝家詠雪徒相比
顧氏傳神實有靈
瓊版欲刊知不朽
芝泥五色耀

天庭

羅隱

儲嗣宗

姚鵠

張翥

又

宋燦

自矢靡他詠柏舟蕭蕭風樹冷於秋堅心勁節知何似
請看袁家母氏樓

精衛填波石望夫恩勤況鞠藐諸孤畫圖省識春暉在
腸斷中林反哺烏

又

黃鏞

竹柏盟貞操斯樓洵可傳黃泉非易報碧海不難填闕
月光偏閱諸孤痛莫捐闈幃留正氣圖畫足千年

又

趙文楷 太湖

樓下環生竹柏齊樓頭霜月共妻妻傷心一掬相思淚
長伴慈烏夜夜啼

辛苦丸熊十五年佳兒佳婦綵衣鮮人間縱有長生酒
何似重逢向九泉

又

周鏗 長沙

兒已成人授室母年時已四十兒欲爲壽承其歡母所
述者辭悲酸我所欠者一死耳未敢殉夫緣有子子旣
成立我志明我事畢矣我生輕從夫地下意久決生長
死期剛兩月此語聞在乾隆四十六年春之三閏月六
日母飯已含吁嗟乎從容者難慷慨易到頭一死皆節
義十五年中心淚枯丸熊畫荻馴其孤久作未亡亡可
罪死者復生生不愧

天子聞之旌其閭潛德遂與史乘符我友澗東示我長
卷畫有樓影與竹柏亞云是袁母韓孺人所居人往樓
空事可書我撫斯圖爲太息母之死也盡婦職誰知弱
草棲驚塵此亦求仁而得仁有子純孝作永慕風木分
明圖內具柳村有婦死不愁節母有行芳長流無已請
看竹柏樓竹柏樓心悠悠

又

瞿中溶 嘉定

予生廿八痛失母茲過三十鮮朋儔心如死灰行槁木
入世往往多招尤造物未付脂韋骨安能彊我同熏蕪
吳門壹識袁孝子水乳膠漆情偏投孝子何好好讀書

讀書之外無他求曷時與予道衷曲不禁涕泗橫交流
自言我生蚤失怙但知依母居高樓到今母已弃我去
樓前竹柏徒脩修我母音容雖闕宗我母苦節圖長留
寫之縑素傳海內名公題詠如雲稠異日歸來與君看
君須爲我書緣由屠維協洽孟陬月煙波朝泛輕如鷗
紅蕙山房良友集大闕寶臧同探幽思翁論帖最竒妙
文沈翰墨宛龍虬穉庵公象胥臺札清芬世澤光凝眸
最後手奉一篋出含淚問予猶記不予聞斯言急發篋
開卷一尺風颼颼肅然起敬瞻毋儀柏心竹節真相侔
惜予筆拙言不文譬如小鳥鳴啁啾爲感知已相屬意

閉門大把枯腸按幸哉母與子慈孝兩千秋曹妻韋母
已足傳何況湘君血淚共姜舟

又

鈕樹玉 吳縣

寒光百丈生鮫綃高樓颯颯霜風飄展圖未竟生棖觸
一時涕淚零終宵予生六歲痛失怙家徒壁立門庭蕭
同胞一妹及一弟獨仰母氏操劬勞徧嘗荼蓼得成長
一妹已逝魂難招予年十六離顧復奔走千里慚篋瓢
倚門倚閭豈不戀衣食所迫誠無聊迄今四十尚潦倒
所幸老母精神饒追思少日繞膝下含熊畫荻心力焦
茲來得從君子後專賴慈訓嚴薰陶袁君純孝世希有

十年把臂忝論交罔極之痛時在口春暉寸草焉能拋
前歲命予詠霜哺率爾握管羞空枵茲復披圖見竹柏
煙雲慘澹凝君蒿予雖登堂未拜母熟聞貞節邀

恩褒名公海內盡題咏自顧凡鄙輕鴻毛天涯竊幸得
知己況乃孤露符相遭賢母之賢傳衆口孝于惟孝誰
同條桐花萬里起雛鳳表揚先志亦孔昭海枯石爛有
時見一絲真性恒難凋

又

顧 蕓 吳縣

矯矯者柏森森者竹竹節久益堅柏心寒始覺我識袁
子欽母德柏耶竹耶見儀式欽母德爲母慶慶得賢子

表母行名公巨筆徧題詠秋月冰壺光掩映如母德者
天下固希有有母未必皆有後後人才名不足傾當世
誰爲筆之垂不朽吁嗟乎翠柏植空山孤竹長寒谷徘徊
桐當歲暮何人訪幽躅吾讀史公伯夷之傳嘗愴神湮
沒豈特閩中人

又

顧廣圻 元和

竹柏能傳母霜天監立孤枝閒啼寡鵲林際泣慈烏論
行高詩史垂名繫頌圖幸哉兼有子門德舊推吳

謂重其孝子

又

黃丕烈 吳縣

蓋聞漢家中壘曾畫屏風晉代虎頭亦圖佩服

惟編傳於列女可附益以後人又愷二兄凜式
穀於王孫素欽節義遵詒謀於棠邑久著賢明
出示先伯母韓太孺人竹柏樓居圖虞嬪行篤
江湘之泣血猶斑衛寡 字依御覽今本誤作宜 心勞石虎
之寓言何苦居樓不下跡守漸臺獨宿何傷心
甘蓬室 丕烈 跋後終慙長睿恍觀仁智之圖校
書竊慕子容親見母儀之像文擬續夫一卷詩

用頌以四言其辭曰

陶嬰少寡 貞順 高行處梁 貞順 夫人省茲 頌義 執節有

常 節義 勤懇治中 母儀 知世紀綱 頌義 左琴右書 賢明

二

五

小序

十五

莞葭爲牆賢明十四處子擇藝母儀十一言成文章頌義小序稱列先

祖母儀八亦無愆殃母儀五蓋母有力母儀三君子稱揚貞順十三

表其閭里賢明七德行光明母儀九

又

夏文燾 吳縣

後凋柏可與松伴慈竹森森節自脩從此常看餘蔭在

清風好與其千秋

與君過從每流連拜母升堂空悵然陟屺不堪同此痛

傷心我已廿三年

又

陸鼎 吳縣

荻灰冷矣歐陽氏去古頽波流不止何人防禮復明詩

有母難能兼有子請看巾幘有完人潔白如環持此身

卽今風木餘音響猶見哀容動伯仁當年阿母撫孤讀

書聲欲斷機聲續坐聽樓頭烏夜啼寒爐灰死秋燈綠

不知隣女有餘光素月流輝不啓窗一自空梁飛義燕

四檐花發謝明粧斷頭金線畱鍼篋血痕半落真珠粒

心碎寒衣刀尺聲佳兒忽看成行立稱未亡人十五年

一朝遺訓下重泉白華補句傳圖畫金管齋書節孝篇

此日煌煌舊庭戶中有

龍章賁天府獨看樓上無春容雪柏霜筠照千古

凝平仄各一首題韓太孺人竹柏樓居圖

朱熹 吳江

高樓居嫺嫺宵寒燈無光孤鸞飛形淒離鴻悲聲長丸
丸徒為舟蕭蕭偏凌霜清芬應推袁千秋同其姜
獨處十五載淑質秉勁節茹檠佐膳謹畫荻教子切懿
範繼列女大義表綽楔再拜展卷讀頌者凜玉潔

又

李銳 元和

亭亭修竹凌虛空沈沈古柏交青葱竹柏四圍樓百尺
賢母秉節居樓中母年十九相夫子嫁後六年夫子死
盛年已作未亾人從此登樓不下矣魂然獨處撫遺孤
以教以育心勤劬森森竹柏護樓前樓前往往聞啼鳥

一鐙熒然課兒讀五夜妻涼風謾謾風吹竹柏時有聲
似與書聲相斷續簾櫳闌寂屏帷冷轉展憂心淚如綆
紙窗漏月月無光一片模糊竹柏影春去秋來十五載
兒能成立母心殆桃穠李豔曾幾時勁節貞心終不改
從夫地下分所宜兒為母壽母力辭一朝示疾竟長逝
孤兒失母肝腸摧樓空無人暗塵積畫荻丸熊記疇昔
放聲一哭風怒號竹柏蕭蕭碎寒碧竹泣露兮柏凝霜
孤兒獨立空傍徨顧瞻竹柏懷母德弗忍翦拜如甘棠
音徽寫出丹青手竹柏圖成垂久久吁嗟乎竹柏枯槁
會有時惟母之節真不朽

霜哺遺音卷五

隨題隨梓不叙爵齒

詩

題竹柏樓居圖

伊秉綬

寧化

森森柏蔭小琅玕
窈窕仙居獨寡歡
當日清霜千葉勁
只今空翠一樓寒
衛風憂隱舟曾泛
湘水波澄泪欲殘
傳語泉臺休悵望
盈階春靄馥芝蘭

正字又

郭

淳

吳縣

清風肅衣冠
瞻謁貞節堂
袁子秉至性
每道母行詳
母年始十九
遣侍嚴親傍
君母喜佐治
姊妹相扶將
擘畫九載中
庭草無凋霜
倏邁靈椿萎
鳳影亦高翔
母痛失

所天蓐蟻甘身嘗俯念我六齡有願且料量攜我上小樓
隻手竭龜皇形影誰相依糜釜麻績筐淒鐙課我讀
周環燠與涼閒時中腸坼淚血闔盈眶屏聲樓上頭十
五年爲常四十初度辰冀母愁心忘我偕兄嫂言博歡
具酒漿聞言母遽色有觸情倍傷早欲殉亡人人故稱
未亡兒今已成室吾願始得償蠶死絲久絕忍聽弦高
張示疾方兩月子母渺相望
旌門幸邀典紀行累篇章緊我母音容且託縑素光爰
示樓居圖因之涕浪浪慈烏向曾雲烏雛日彷徨樓陰
直堂北竹柏恒青蒼

又

張振德

木有根兮水有源天教絡秀造於袁清逾冰雪全真操
事到艱難無間言一代鴻篇昭淑德千秋綽楔表貞魂
至今竹柏樓頭月猶照寒闥畫荻痕
節母風徽簡冊傳一回披讀一流連搖搖燈影九熊夜
軋軋機聲落葉天擬其藁砧矢同穴不教萊綵祝長年
從夫教子雙酬願廿載冰心皎日懸

又

戴殿泗 浦江

蕭然塵壒遠竹柏一高樓對月香心苦因風勁節留哀
鴻弦外意別鵠畫中秋奕世難忘處星霜十五周

又意似... 邵葆祺 大興

竹影蒼涼映柏枝當年樓上課書時青鐙自揜孤兒淚
綵筆休賡壽母詩人昔未亡心早死天教有後恨無遺
離鸞返馭江城夜應報重泉一展眉

又

陳廷慶 奉賢

有筠莫如竹有心莫如柏保此歲寒姿高埒樓百尺百
尺望巋然光陰真過隙冰操十五年蘭階蔭遺澤

我來楓江上頻登五硯樓硯田食自足林風灑常留燁
管古待述畫荻今誰侔懿美難罄頌悵發寒塘舟

又

唐仲冕 善化

竹柏何蕭森雲陰護蒼翠高樓照寒日嚴風動涼吹哀
哀寡鶴吟幽咽併聲淚念昔相夫子婉婉明大義馨悅
及酒漿家事佐修治晨昏盡其職動合女君意一朝失
所天愁慘若顛墜藐諸膝下兒鞠育安所寄怙恃一身
兼忍死啓後嗣青燈耿空帷疑塵暗遺笥飼以熊和丸
教以荻畫字有子克承家慰此冰蘖志蒼柏本堅貞翠
竹豈彫頽柯葉貫四時詎以稜寒異遷矣十五年孤樓
鬱深悶追養寫爲圖音容差可識長卷更數番題詠若
鱗次長吏不能文風化表醇懿弄玉臺已蕪關盼儼非
類永令懷清人披圖動遐企

又對書人

謝啟昆 南康

韓氏女袁家婦婦于歸年十九越六年喪所天哀烏夜
月彈孤弦香溪之濱寡鳳棲竹葉青青柏葉齊餐竹實
飲柏漿斂羅襦守空房樓上居哺其雛泪洒竹色不枯
心比柏堅不渝一樓寒影照讀書荻灰冷逼篝燈虛再
三作圖狀貞潔惜哉不遇王摩詰一腔誰寫湘妃血禿
毫難繪柏舟節暮倚脩竹翠袖寒繡佛長參柏子禪不
展眉黛整花鈿風風雨雨霏綠烟飲冰茹蘗十五年婦
道母道肩其全四十稱觴曰舍旃嗟未亾人軀可捐嗚
呼古來烈士亦如此信國小樓臥不死奚啻袁宏土室

裏

又

吳照 南城

夫死妾不死稱未亾人撫我孤我孤甫六齡我身隱約
雙淚枯樓中一燈樓影黑機聲軋軋兒咿哦妾登此樓
年廿五今四十矣歲月徂身雖未亾亾已久兒幸成立
妾從夫一病不起兒號呼上樓下樓聲嗚嗚青青者竹
磊磊柏雪壓霜摧見標格此圖此圖孝子心終身之慕
霜哺音

又

潘世璜 吳縣

筠節還疎直銅柯尙屈盤貞姿長不改慈範溯應難心

苦冰霜厲樓高風雨寒只今圖畫裏空對樹團團

又

蔣寅 吳縣

披圖氣森然令我肅容止如何素練光中有嚴霜起嗚呼竹柏樓節母魂戀此載拜裁短詩同之薦芳芷

又

阮元 儀徵

竹柏三千尺冰霜十五年高樓貞苦節令子是名賢慰藉方歸地艱難報所天春暉卷旆草心在此樓前

又

孫韶 上元

誓撫遺孤慰所天鳴機深夜淚潸然冰心朗似青天月冷照胥江十五年

子舍名成弱冠時凌霄竹柏有新枝半生和膽辛勤意合有樓頭風雪知

夜半焚香告夜臺新迎佳婦畫堂開而今了却君家事妾亦相隨地下來 事見本傳

袁安家世舊知名賢母風同臥雪清一自九天來綽楔人間傳遍魯陶嬰

又

王紹蘭 蕭山

何地無竹柏筠心貫此樓韓康藥易戒 節母病 袁粲死難求白板丁簾密青鐙丙夜幽哺霜兼卧雪宅裏已千

秋

霜哺遺音卷六

隨題隨梓

詩

閨秀

輓袁節母韓孺人

孫雲鳳 錢唐

凜凜柏舟志煌煌青史美
燦燦寶婺光耀耀彤管煒韓
家有靜姝筵室歸袁氏堂上
佐蘋蘩警且雞鳴起當戶
鼓瑟琴飼蠶執桑筐一日嚴
霜來蘭推蕙復委或曰大
厦傾吾生將安止有子未成人
妾身敢輕死孤燈課簡
篇空樓謝羅綺撫孤事既終
何暇及尊壘瞑目地下遊
貞心遂厥始殉節能從容
誠哉識大體千古配女宗清
風了無已

又

徐蘭韞 仁和

頌椒才思重閨房畫荻賢聲達
帝鄉冰蘖志傳周絡秀松筠心仰衛共姜預知碧海來
鸞馭不受春風晉彩觴竹柏樓中塵跡杳孤芳贏得史
流香

題竹柏樓十韻

汪纘祖 仁和

婦德自昔垂周禮苦節尤貞未亡人揚名已有詩壇伯
紙尾容我批糠陳欣聞筵室萃正氣不降不辱志與身
清操豈必臺更築高樓棲託超紅塵柏舟自詠傷世子
竹淚流斑弔湘神取名茲樓毋乃是撫孤大義頻年伸

丸熊佐讀歷歲月畫荻傳書含悲辛未幾總角突而弁
瑟琴調協箎與塤年方四十病且卒白雲縹緲江之濱
只今音容樓際杳竹柏猶占長年春

題袁節母竹柏樓

孫雲鶴 錢唐

歐陽畫荻今誰續德門有婦清如玉正向房中賦小星
俄驚調裏歌別鵠竹柏樓頭靜掩門蕭蕭風雨幾朝昏
撫孤事大持身重不敢輕離化石魂巢雛能作穿簾燕
身隨力盡吾何怨死也如生此日名生而誓死當時願
臯魚風木戀春暉每到登臨淚滿衣架上久無含罷膽
窗前猶有織殘機遐哉閨範垂簡帛想像高風樓百尺

更藉丹青寫母儀綿延世世留貞白柏兮竹兮霜雪餘
母兮母兮金石節

竹柏樓歌爲袁節母韓孺人作

張秉彛 錢唐

西風蕭蕭江水白千里雲山懷貞魄吳中袁氏竹柏樓
人杳樓空但陳迹勁柏參天集暮雅翠竹橫窗垂小帶
憑空弔影倍淒然離離砌草寒朝夕憶昔孺人未字時
姆教女紅標清格芳年十九筮於袁爨汲勤勦順而懌
一自山頽草弗春奮志含酸與世隔顧念呱呱泣者誰
食息須扶增護惜寒烟漠漠樓小樓一片冰心如鐵石
茹茶飲蘗撫煢孤半地篝燈勤刀尺丸熊畫荻兼嚴慈

皎若青霜冽砂磧春鷓秋蟀任推遷荏苒寒暄十五易
令子嶄然冠且婚融融壽筭流金液明陳大義遂初衷
芳徽含笑從窀穸當代名公聯鉅章共翊女貞高巾幗
恩綸奕奕

旌門閭千秋彤管昭丹冊我聞壺德肅儀容桂酒未經
奠瑤席不見孺人當年苦節時徒歎竹柏樓前皓月涵
空碧

題竹柏樓居圖

丁 愔 吳縣

翠柏凌歲寒修竹挺高節同秉鐵石心鍾靈到蘭質蘭
質別鶴彈飲泣淚頻滴樓居十五秋撫孤成家室付託

計瓮了所天忍永隔志畢謝塵世乘化歸空寂哀哀風
木心追慕無終極寫圖誌母儀千載如一日

又

吳淑慎 仁和

吳閭曾說女宗賢坐卧高樓十五年心似岱巖蒼柏苦
節偕湘水翠筠堅不親細務憑家督但課嬌兒報所天
婚嫁畢完男女事惟期重會在黃泉

十九來歸卧雪門衾裯長抱侍晨昏一朝夫去心同去
六歲孤存身暫存人是未亡辭介壽花纔有病莫招魂
楓江柳浦遙相隔空想遺顏積淚痕

又

江 珠 元和

同雲密密雪壓枝槎枒老幹多奇姿危樓屹立高百尺
周遭竹柏酸風吹操心愈苦節愈堅小樓坐卧十五年
默矢撫孤強忍死大節不在微軀捐銜悲茹血勞撫育
寒村千匝勤課讀一燈熒熒終夜然左列詩書右機軸
令子學成甫授室子婦成行事粗畢行將九京告若翁
燕喜稱觴示微疾一朝馭鶴歸瑤宮秋聲蕭瑟秋雲空
樓中人去不復來滿樓竹柏號寒風畫中竹柏充供養
樓前蒼翠今無恙吁嗟勁質寫易成孝子寸心苦難狀

又 擬盤中詩

金 兌 吳縣

鸞鳳心不離別色絲根不斷絕霜風吹樹折枝一夕悲

長
心蘭爲佩羅作襦形影單神悽而樓前月清夜長
樓中人空斷腸義從夫烏敢忘兒讀書母辟纒春忽秋
且又晡夫有心妾知之母有心子志之直者竹勁者柏
清者霜白者雪柏有心竹有節十五年心惻惻孰無情
而敢滅竹之淚柏之舟淇水止湘水流人去矣樓成圖
空樓到頭啼夜烏風高烟白秋氣孤樓前草綠人有無
母心如水庶不渝冰鏤玉琢爲此詩詩周四角旋中區

又

方芳佩 錢唐

若有人兮樓之中秉貞性兮熒熒撫孤兒兮歲十有五
茹冰霜兮志彌苦歷歲月兮遲遲春鵲與嘯兮秋雀與

悲文柏兮修竹散清芬兮樓角竹影猗猗兮柏葉齒齒
顧令子兮母心以喜旣喜兮旣哀從逝者歸來母歸兮
兒泣望樓慙慙奉圖啼血竹有節兮柏有心思母德兮
不敢寧撫樓前兮竹柏與母節兮比貞

詞

題竹柏樓

調百字令

何琪 錢唐

吳中有母凜娒孀歲歲樓中獨處視息人間聊復爾心
已早歸黃土萬个疎篁十圍喬柏翠色交牕戶夜來風
攪幾番添得淒楚 有子夙擅驚才早成令器千里欣
重覩他年會見表瀧岡不負丸熊辛苦虎阜亭臺獅林
樹石遊冶徒爭慕斯樓長在巋然自足千古

又 調采桑子

陶梁 長洲

十年辛苦將雛意燈下機聲剝下書聲寂寞樓高春掩
門 碧天縱是鸞歸去竹也長青柏也長青留與空山

弔女貞

又

李福
吳縣

蕭蕭竹柏青長在人足千秋樓足千秋十五年來未下
樓只今風木頻增痛母也如歐子也如歐不負將雛
一片愁

贈袁子壽階移居西塘序

余過大江南獲交二孝子焉皆節母之後能事賢
友仁以顯其親者一爲吳縣袁子壽階一爲蕭山
汪子龍莊龍莊少孤二母鞠之有成所居建雙節
堂遍求天下鉅公名士之詩若文至五百餘家刊
傳之行于世一時翕然稱其孝及壽階刊有霜哺
遺音出其卷帙之富不逮汪而詞旨精美或過之
霜哺遺音者壽階爲其母韓太孺人苦節乞言之
所哀而輯也余與壽階遊每言及太孺人有悽然

之色間出其先世手蹟自有明來如謝湖胥臺諸公之簡牘及當時名流記序志銘投贈之篇什積成若干冊彪彪麟麟侔于宗器歷數百年弗敢遺且日有增焉此又汪氏之所未逮者余初過吳閶壽階以竹柏樓記見屬時方有西湖之行未有以應比歸而壽階已移居楓橋西塘之舊廬乃與二三友人鼓棹而訪之問所謂竹柏樓者無恙也登其堂有鬱鬱葱葱之氣花木水石各備其勝遂相與談宴竟日于五硯樓下余惟古之人念手澤口

澤之遺思其居處思其笑語終其身不忘其親用茲日愼一日克弗隕其令名方太孺人之在斯廬也孤燈熒熒形影相弔足不下竹柏樓者閱十有五年卒乃殉夫以遂其志匪第手口之澤而已也則壽階之眷眷于此也固宜且太孺人飲冰茹蘗惟冀其子之成立以報所天耳壽階上承世德績學有聲乃能得賢士大夫之贈言以表其節以光于奕葉此太孺人之志也非太孺人無以成壽階之賢非壽階無以彰太孺人之德誦昔人春暉寸

草之詩其爲報也有令人油然而生感者矣汪子以
進士起家爲刺史有治聲其子又舉于鄉其進隆
隆焉而未有已論者以爲節孝之報由是推之則
袁氏之積厚流光庶幾遲之久而愈大也是可以
壽階之賢卜之也壽階有移居詩和者甚衆余獨
感其不匱之思竊附于張老頌禱之義爲之序而
贈之至太孺人懿行之全諸前輩具詳之不復贅

嘉慶丁巳秋七月旣望楚南薌泉居士謝振定序



